







姚秦 · 鳩摩羅什譯
明 · 吳郡沙門大佑解
明 · 天台沙門傳燈鈔

阿彌陀經畧解圓中鈔

印光大師讚語：

《彌陀圓中鈔》理高深而初機可入，文暢達而久修咸欽。

(按：本書流通既久，錯訛甚多，已經印光大師校正恢復舊觀。)

彌陀圓中鈔目次

彌陀略解圓中鈔序

傳燈

1

重刻彌陀略解圓中鈔勸持序

印光

5

佛說阿彌陀經略解序

次能述人

9

三所述序

二

初序說經之由

二

初序緣起

二

初推尋源流

二

初真源不二

10

次妄派成殊

次正序緣起

次序說經

初序住處機宜

次序所說法要

四

初序經名

次序經體

三序宗要

四序力用

二

初正明力用

24

22

20

19

17

15

13

次所發功勳

次序註解之由

26 27

初正序

三

初序廣解之由

次序略解之由

三正序略解

二

初序謙光

28

次序己志願

二傍序

29 30

彌陀略解圖中鈔 卷上 目次

次釋解二

33

初釋題解二

初題解二

初標題

二分子科二

初總標

二別釋五

初釋名二

初標

35

二釋三

初釋今題二

初通別各釋二

初釋別題二

初約能說所說釋二

初釋佛說二字二

初二字合釋

一二字各釋二

初釋佛字

二釋說字二

初詰訓釋

二簡異釋

40

二釋阿彌陀

二

初翻梵

二釋義

二

初釋無量壽

二

初引經釋

二況勝釋

次釋無量光

二

初別翻

42

42

二引經

二約通號別號釋

45

初正釋

二釋疑

二釋通題

46

初約法常釋

二以由義釋

47

二通別合釋

初指通別二名

二明通別所以

五

48

初通論一化

二別指令題

三判其通別

四結成秘藏

五結成功德

二出本名

三辨譯異

初總標

二別明

初唐譯

二秦譯

初與唐辨異

二讚秦譯善巧

二辨體

初標

二釋

初引論明體

二結成所詮

三明宗

初標

二
釋

初引經證成

二結成宗要

58

四明用

初牒

二釋

初引經證成

二結成力用

五判教相

初總標

60

59

二釋相

二譯人

初標名

二解義

初明其生處

二明其翻譯

三證其功德

65

二釋經文

初總別科判

初總科三分

| | | | | | | | |
|--------|----|-------|---|-------|---|-----|--|
| 二別明二序 | 67 | 二依科解釋 | 三 | 初釋序分 | 二 | 初分科 | |
| 二釋經 | 68 | 二釋經 | 二 | 初五句證信 | 二 | | |
| 初列經 | | | | | | | |
| 二釋義 | 69 | | | | | | |
| 初釋所指法體 | | | | | | | |
| 二釋所顯能聞 | | | | | | | |

三釋所明機感

四釋所稱化主

71

五釋所述住處

二

72

初釋舍衛國

二釋祇樹給孤獨園

二

73

初出二人名德

二

初祇陀

二須達

二明二人並稱

二列眾同聞

74

初分科

二釋經

初聲聞眾

初示數

初列經

二解義

初釋明類

二釋示數

三釋顯位

四釋歎德

二列名

初牒科

二釋經

初列經

二釋義

初釋長老

二釋眾名

十六

初釋舍利弗

二釋目犍連

三釋大迦葉

四 釋摩訶迦旃延

五 釋摩訶拘絺羅

81

六 釋離婆多

七 釋周利槃陀伽

八 釋難陀

九 釋阿難陀

十 釋羅睺羅

82

十一 釋憍梵波提

十二 釋寶頭盧頗羅墮

十三 釋迦留陀夷

83

十四 釋劫寶那

十五 釋薄拘羅

十六 釋阿彌樓駄

三 總結

初牒科

二 釋經

初列經

二解義

二菩薩眾

初分科

二釋經

初列經

二釋義

三列名

初牒科

二釋經

初列經

二解義

五

初釋文殊

次釋阿逸多

次釋無量諸天

95

初釋釋提桓因

二釋義

三

初列經

二釋經

二

初牒科

三人天眾

二

五釋總結

94

92

四釋常精進

91

三釋乾陀訶提

三釋大眾

次釋正宗

初總判三科

二依經釋義

初分科

二釋經

初依正莊嚴

初總示

初依報莊嚴

初列經

二釋義六

初釋爾時

二釋當機

三釋界數

四釋極樂

五出四土

二

初總標

二別釋四

初寂光土

二實報土

103

102

101

97

| | | | | | | | | |
|---------|----------|---------|-----------|---------|---------|---------|----------|----------|
| 二 釋義 | 二 初列經 | 二 釋經 | 二 正報莊嚴 | 六 簡別 | 次 釋義 | 初 出名 | 四 同居士 | 三 方便土 |
| | | | | 108 | 107 | 106 | 105 | 104 |

初釋三身二

初總標

二別釋三

初法身

二報身

三應化身

次釋簡異

二別釋二

初分科

二釋經二

116

115

112

110

109

初依報

初總明極樂

初列經

二釋義

二別示莊嚴

初分科

二釋經

五

初欄網行樹

二

初列經

二釋義

四

二釋義六

初列經

初正明二

二釋經二

初分科

二華池樓觀二

129

四釋四寶

125

三釋行樹

次釋羅網

初釋欄楯

| | | | | | | | | | |
|-----|-----|-----|-----|------|------|------|--------|--------|-------|
| 初列經 | 二釋經 | 初牒科 | 二結成 | 六釋四華 | 五釋樓閣 | 四釋四寶 | 三釋金沙布地 | 次釋八功德水 | 初釋七寶池 |
| | | | | 138 | 136 | 135 | 134 | 131 | |

二釋義二

初正釋經文

次指所引文

三金地天華二

初牒科

二釋經二

初列經

二釋義六

初釋天樂

二釋黃金為地

142

141

三 釋曼陀羅華

四 釋衣械

五 釋供養

六 釋食時

四 灵禽說法

初牒科

二 釋經

初正明

初列經

二 釋義

六

148

147

145

143

初釋奇妙

次別釋眾鳥

三釋和雅

四釋道品

初正釋

次五根

次釋五力

三七菩提分

四八聖道分

二指闕

157

155

153

152

五風樹樂音

二

次釋淨土惡道有名無體
初釋淨土惡道有名無體

166

二釋義

二

初列經

二

二釋經

二

初牒科

165

二釋疑

二

六釋生心

164

五釋正念

161

二釋經二
初分科

171

彌陀略解圖中鈔卷下

二正報二

次引文明淨

168

二釋義二

初引經類明

初列經

二釋經二

初牒科

167

初教主名號

初徵名

初列經

二釋義

二釋義

初分科

二釋經

初名含二義

初光明無量

初列經

二釋義二

初引大本明光明無量

次引觀經明光明之用

174

三設問答釋或者之疑

175

二壽命無量二

初標科

二釋經二

初列經

二釋義二

177

初引大本明壽無量

次引大本明本願所致

178

二道成十劫

二

初標科

二釋經

二

初列經

二釋義

三

初會通前文

次會通二經

三會通勝應

二眷屬莊嚴

180

初分科

二釋經三

初弟子無量二

初列經

二釋義七

初釋聲聞眾

次揀異三果

三明無緣覺

四明無二乘

五菩薩無量

184

183

182

181

| | | | | | | | | | | |
|-------|-----|-------|------|-----|-----|-----|-----|-------|-------|-------|
| 三補處甚多 | 二 | 次引證大本 | 初釋不退 | 二釋義 | 二釋經 | 初列經 | 初標科 | 二生者不退 | 七結歸化主 | 六判教傍正 |
| 189 | 188 | | | | | | | 187 | 186 | 185 |

初標科

二釋經

初列經

二釋義

初通釋其位

次的指其人

三引大本證

二修證行法

初分科

193

191

190

二釋經

初信願

初發願求生

初列經

二釋義

初釋相

次引證

初引天親

次引四明

二聖賢聚會

初牒科

二釋經

初列經

二釋義

初釋諸上善人

初泛指三品

次的指勝者

二釋俱會一處

二修行

初分科

二釋經

198

197

初反顯餘善不生

二

初列經

二釋義

四

初釋少善根

次釋多善根

三明正與助

四引證助行

二正示持名方法

二

202

初牒科

二釋經

二

初列經

二釋義五

初釋執持之義

次釋若字之義

三釋一心不亂二

初總標

二分釋二

初事一心

次釋理一心二

205

初明一心三觀

206

次明性具宗旨

四釋本經稱名

五訂此經訛脫

初出古本

三

218

215

214

次訂訛脫

三況顯持名

219

三感果

223

初分科

二釋經

初感聖迎接

二

初列經

二釋義

二

224

初隨品所感

次破斥謬解

三

初序謬

二斥過

三引證

226

225

二正念往生

二

初牒科

二釋經

二

初列經

二釋義

初明佛力攝持

次明白他兼濟

四結勸

初牒科

二釋經

初列經

二釋義

三諸佛稱讚

二

初牒科

二釋經三

初釋迦稱讚二

初列經

二釋義三

初釋稱讚所指

次明秦譯之簡

三指科判之失

232

二諸佛同讚二

初牒科

二釋經

六

初東方

二

初現相表彰

二

初列經

二釋義

四

初釋佛名

五

初釋阿閦佛

次釋須彌相佛

三釋大須彌佛

四釋須彌光佛

五釋妙音佛

次釋恒河沙

三釋廣長舌相

四釋三千大千

二發言勸信

239 238

初牒科

二釋經

初列經

二釋義

初釋令生深信

次釋是本經題

二南方

二

初牒科

二釋經

二

初現相表彰

二

初列經

二釋義

五

初釋日月燈佛

次釋名聞光佛

三釋大燄肩弗

243

242

240

四釋須彌燈佛

244

五釋無量精進佛

二發言勸信

二

初牒科

二列經

245

三西方

二

初牒科

二釋經

二

初現相表彰

二

初列經

二釋義七

初釋無量壽佛

次釋無量相佛

三釋無量幢佛

四釋大光佛

五釋大明佛

六釋寶相佛

七釋淨光佛

249

248

247

246

初牒科

二發言勸信

二

二列經

四北方二

初牒科

二釋經二

初現相表彰二

初列經

二釋義五

初釋談肩佛

次釋最勝音佛

251

三釋難沮佛

四
釋日生佛

五
釋網明佛

二
發言勸信

初牒科

二
列經

五
下方

253

初牒科

二
釋經

初
現相表彰

初列經

二釋義六

初釋師子佛

次釋名聞佛

三釋名光佛

四釋達磨佛

五釋法幢佛

六釋持法佛

二發言勸信

256

初牒科

二列經

六上方

初牒科

二釋經

初現相表彰

初列經

二釋義

初釋梵音佛

次釋宿王佛

三釋香上佛

四釋香光佛

257

258

五釋大燄肩佛

259

六釋寶華嚴身佛

七釋娑羅樹王佛

260

八釋寶華德佛

九釋見一切義佛

261

十釋如須彌山佛

二發言勸信二

初牒科

二列經

262

三徵釋經題二

初分科

二釋經

初徵

初列經

二釋義

二釋

初牒科

二釋經

初列經

二釋義

四

初約三經釋

次約附文釋

三約果號釋

四約功用釋

三流通分

初牒科

二釋經

267

初佛勸信受

初勸信

初列經

二釋義

二顯益

初分科

二釋經

初由因克果

初正示

二初修因

初列經

二釋義

二因果

初牒科

二釋經

初列經

二解義

二結勸

初牒科

二釋經

初列經

二釋義

初明揀機

次明他用

二舉難況易

271

初牒科

二釋經

初我讚諸佛

初列經

二釋義

初明二譯不同而同

次引經證不同而同

三結二譯不同而同

272

二諸佛讚我

273

初牒科

二釋經

初述彼讚詞

初列經

二釋義

初泛明諸佛同讚

次述彼諸佛讚詞

五二三

初明因德立稱

次明稱名之德

275

三釋所化之國

276

初釋娑婆

次釋五濁

277

初總釋

二別釋

五

初劫濁

次釋見濁

三釋煩惱濁

四釋眾生濁

五釋命濁

283

281

279

三 結皆由悲願

四 結難信之法

一 顯示不虛

初牒科

二 釋經

初列經

二 釋義

初明釋迦具足二難

次明二土修行難易

二 眾善奉行

288

287

286

285

284

初牒科

二釋經

初列經

二釋義

初約機收簡

次明益所以

三獲益淺深

四引證深益

五流通永永

附刻

295

291


290

289

拔一切業障根本往生淨土神咒

刻圓中鈔跋

297



彌陀畧解圓中鈔序

天台山幽谿沙門傳燈撰

夫如來口密語意多含譬。王索仙陀婆。一名而具四實。惟彼智臣善解其義。俟王之若出。若食若飲若戰。一唱乎此。則奉之以馬。以鹽。以水。以器。莫不會王之心。適王之意。菩薩智臣亦復如是。善解如來之所說法。於淺法中作深說。深法中作淺說。亦淺亦深法中作非淺非深說。非淺非深法中作亦淺亦深說。造論弘經。豐約適所。既不令智退。亦不使義闕。然後可謂升其堂而入其室也。此佛說阿彌陀經。乃釋迦如來

於深法中作淺說。廣法中作畧說者也。說既畧矣。而智臣爲之解。不得不畧。義既深矣。而智臣爲之解。不得不深。解畧不令其智退。理深不令其義闕。以畧探廣。從容中道。余於吳門蘧菴大師畧解見矣。其序有曰。瓊林玉沼。直顯於心源。壽量光明。全彰於自性。又曰。了唯心之本具。億刹非遙。知大願之可憑。三祇橫截。噫。括盡全經厥語。何其畧。惟心本性。厥義何其深。微菩薩智臣。烏能至於是乎。今爲之鈔。而特題爲圓中者。意以極樂依正爲妙有。一心持名爲眞空。微眞空。而莫能證於極樂之妙有。微妙有。而莫能顯於此。

心之真空。所謂不思議假。非偏假。真空不空。非但空合是二者而行之。則圓中圓滿。非但中之道成。是故命爲鈔焉。意欲讀是經而修行者。顧名思義。誠宜一心不亂。而萬慮皆忘。則真空之理彰。七日持名。念念相續。則妙有之理顯。行成而見佛。心淨而華開。娑婆之印壞。而極樂之文成。印壞所以空其情。是之謂真空。文成所以立其法。是之爲妙有。二者俱忘而俱存。彌陀之經厥語所以畧。厥義所以深。爰因鈔次。故揭題義。而漫爲之序云。

皇明天啟龍飛之初年季冬哉生明下筆故序

弘農金匱

卷一

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

重刻彌陀畧解圓中鈔勸持序

念佛求生淨土一法。乃十方諸佛普度眾生之要道。九界眾生速證佛果之妙門。諸大乘經皆啟斯要。淨土三經專明其致。世多習矣。不察視爲淺近。謂不若教海之宏深。禪宗之直捷。每揚宗教而抑淨土。尙自力而惡佛加。當仁固讓。見義不爲。致如來徹底悲心。鬱而不暢。眾生出苦捷徑。塞而罔通。今不避罪責。畧引證據。冀見聞隨喜。同生蓮邦。如來初成正覺。爲四十一位法身大士。演大華嚴。及至入法界品。善財以十信滿心受文殊教。徧參知識。初見德雲。一聞念佛。

法門。卽證初住。從茲隨參隨證。及五十三至普賢所。普賢以威神加被。卽時善財所證。與普賢等。與諸佛等。普賢乃爲說十大願王。勸進善財。併華藏海眾。向西方極樂世界。而觀經五逆十惡。地獄相現。十稱佛名。卽得往生。夫法身大士悉願往生。阿鼻罪人尙預末品。法門之宏深直捷。孰有過於此者。誠可謂教海之南針。禪宗之北極。一切諸法。無不從此法界流。河沙妙義。無不還歸此法界。以故西天文殊。普賢。馬鳴。龍樹。東土遠公。智者。善導。永明。或發願而說經。文殊或註經而造論。莫不以此法門。自行化賢。有發願經。普賢說行願品。

他普利含識。而古人欲令舉世咸修。故以阿彌陀經列爲日課。以其言約而義豐。行簡而效速。宏法大士註疏讚揚。自古及今。多不勝數。於中求其至廣大精微者。莫過於蓮池之疏鈔。極直捷要妙者。莫過於蕩益之要解。幽溪法師握台宗諦觀不二之印。著畧解圓融中道之鈔。理高深而初機可入。文暢達而久修咸欽。奈流通既久。錯訛甚多。因較訂重刻。俾復舊觀。彌陀一經。得此三疏。法無不備。機無不收。隨研一種。亦可知其指歸。徧閱三書。方堪徹其闡奧。自此圓發三心。執持聖號。期出五濁之惡世。冀證四德之玄猷。

如是則臨命終時。定蒙彌陀接引。聖眾偕迎。託質蓮胎。離險道以安居寶所。聞法受記。由同居而頓證寂光。撩起便行。阿誰無分。書此愚忱。敢告同人。

此鈔立法迥異常式。無論若科若經。若解皆以鈔科統之。故序鈔首科。卽次能述人。而闕初所述題。解鈔首科。卽次釋解文。而闕初列解題。以兩處首科不便列於題前。但影畧之。令閱者自領會耳。又疏中所引大本。乃無量壽經。鈔中所引大本。乃大阿彌陀經。幽溪取其文義詳悉。舉世流通。故特引之。致其字句間有不同耳。

釋印光較正并序

佛說阿彌陀經畧解序

明吳郡沙門大佑述

天台山幽谿沙門傳燈鈔

△次能述人

師字蘧菴。大佑其諱也。爲蘇州北禪天台講寺住持。精于教理。其於淨土一門尤得其妙。有淨土指歸集盛行于世。其俗姓桑梓。尙俟詳考。

三、所述序二。初、序說經之由。次、序註解之由。初、爲二。初、序緣起。次、序說經。初、又二。初、推尋源流。次、正序緣起。初、爲二。初、真源不二。次、妄派成殊。

蓋言約真源。則一性之中。原無苦樂之殊。則何須如來出世說經。唯妄派成殊。故我佛示生演教。今先明真源不二。

疏夫寂光真淨。初無苦樂之殊。

鈔寂光者。四種淨土之一也。四淨土者。一、凡聖同居淨土。二、方便有餘淨土。三、實報無障礙淨土。四、常寂光淨土。各有淨穢。唯上品寂光爲真實淨土。餘之淨土。皆帶虛設故。又復應知。真淨之言。非離三土。別有寂光可得。只指下三土之體理。本究竟。與寂光更無差別。故四明尊者妙宗鈔云。須知四

土。有橫。有豎。仍知橫豎只在一處。如同居土。趣爾一處。卽是實報。若破無明。轉身入者。斯是法身。同佛體用。稱實妙報。則六根淨人。亦莫能預。豈居二乘。此則一處。豎論實報。若未破無明。卽身見者。此乃諸佛及大菩薩爲堪見者。加之令見。實報土也。蓋有機緣。雖未破惑。已修中觀。如華嚴會。及諸座席。雜類之機。咸見身土難思者是。實報旣爾。方便寂光。橫論同處。亦復如是。於同居處。論三土橫豎。於方便處。論二土橫豎。於實報處。論一土橫豎。至於寂光處。無橫無豎。當處亦無。今云寂光真淨。乃直

標真體也。初無苦樂之殊。彰離過絕非也。蓋以四
土淨穢言之。於同居娑婆。則惟苦無樂。清泰惟樂。
無苦。以方便對同居言之。則同居惟苦無樂。方便
惟樂無苦。以方便當土言之。則方便穢邦。惟苦無
樂。方便淨土。惟樂無苦。以實報對方便言之。則方
便惟苦無樂。實報惟樂無苦。以實報當土言之。則
實報穢邦。惟苦無樂。實報淨土。惟樂無苦。若以實
報對寂光言之。則實報惟苦無樂。寂光惟樂無苦。
以寂光當土言之。則寂光穢邦。惟苦無樂。寂光淨
土。惟樂無苦。已上皆約修成。不二而二言之。故有

苦樂之殊。今序云。初無苦樂之殊者。乃約性具十界五陰國土。惟有十界苦樂圓融之性。而無十界苦樂差別之相。卽生佛等有真如不變之體。本無淨穢之殊。何有苦樂之異。故此一句科爲真源不二。以爲下妄派成殊張本。楞嚴所謂性覺妙明。本覺明妙。又曰清淨本然。週遍法界是也。四種淨土具如下釋。

△次妄派成殊

疏妄識紛紜。遂有聖凡之異。

鈔妄識者。三惑之總名也。蓋眾生無始已來。從性

覺妙明。本覺明妙中。一念俄然晦昧。而妄爲明覺。
因明立所。所旣妄立。生汝妄能。無同異中。熾然成
異。因而爲三細之無明。塵沙。因而爲六粗之見惑。
思惑。一變而爲寂光穢土。二變而爲實報穢土。三
變而爲方便穢土。四變而爲同居穢土。如是爲菩
薩。爲聲聞緣覺。爲六道眾生。故曰妄識紛紜。遂有
聖凡之異。楞嚴所謂隨眾生心。應所知量。華嚴所
謂能隨染淨緣。遂分十法界。是故科爲妄派成殊。
又復應知。初句雖云寂光真淨。初無苦樂之殊。不
妨乎不殊而殊。卽性具十界也。次句雖云妄識紛

紜。遂有聖凡之異。不妨乎異而不異。卽在性無殊也。良由真如雖不變。不妨乎不變而隨緣。妄識雖隨緣。不妨乎隨緣而不變。以隨緣故。是以不殊而殊。以不變故。是以異而不異。能知乎此。方能了今念佛之心。乃全性以起淨修。全修而在一性也。

△次正序緣起

疏由是漂流五濁。莫返一真。故我釋尊示生堪忍。
鈔此正序如來說經之緣起也。蓋釋迦如來久證真常。何有王宮之受生。但因一切眾生無始墮落。故有娑婆之出世。漂流五濁者。謂眾生無始以來。

從涅槃性海。鼓識浪以揚波。弊澄圓而失湛。渣滓
明妙。泊沒性真。良由先失之以動。故曰漂流。楞嚴
所謂覺明空昧。相待成搖是也。次失之以昏。故曰
五濁。楞嚴所謂晦昧爲空是也。然而昏必具動。動
必具昏。是則流卽濁也。濁卽流也。昏動之惑既形
明靜之真卽失。但此五濁有粗細不同。如楞嚴之
言劫濁云。汝見虛空遍十方界。空見不分。有空無
體。有見無覺。相織妄成。是第一重名爲劫濁。此則
兼三惑而言之也。若如尋常所說。人壽二萬歲時。
方入劫濁。此則獨指見思二惑。最熾盛時以言之。

也。然而或有細不兼粗。而未嘗有粗不兼細。今但正指釋尊示生堪忍之時。而粗者適當其情。若曰莫返一真。亦是兼細以言之也。示生堪忍。正當垂應。凡聖同居穢土。且言劣應丈六老比丘身相而已。若亦兼細惑而言。則義含垂應上之二土也。

△次序說經分二。初序住處機宜。次序所說法要。今先序住處機宜。

疏當祇園之嘉會。告身子之利根。

鈔祇園嘉會說經之住處也。身子利根。所被之當機也。論此經所被機宜。厥品有三。一、菩薩。二、二乘。

三。凡夫。蓋淨土法門。諸小乘經。絕口不談。以子果
既盡。則灰身滅智。不說身後有生。今盛談之。乃菩
薩之法門也。若原此經說在方等。正彈偏斥小歎
大褒圓之時。彈斥小乘界外不生。故云有生。而特
指彼國。有無量無邊聲聞弟子。又極口稱揚彼土
依正二報。微妙莊嚴。則歎大褒圓。寓其中矣。況舍
利弗。又爲眾弟子中上。是以告之。令回小以向大
也。若正所被機。乃居博地。七日持名。一心不亂。卽
得往生。一預嘉會。得不退轉。以是而觀。雖在凡夫。
義屬圓頓。又可知也。

△次所說法要爲四。初序經名。次序經體。三序宗要。四序力用。能詮所詮。不出此四。是故括而序之。以盡一經旨趣。可謂善通大乘者也。今初序經名。

疏開法藏之願門。指樂邦之妙土。

鈔此經備說依正。及以徒眾爲能詮名。而經題但云。佛說阿彌陀大師觀經疏。所謂舉正報以收依果。述化主以包徒眾是也。是則題但言正。乃舉正以收依序。但言依。乃舉依以收正。影互言之。文法之巧也。論此經無開願門之文。以有大本詳言。是故畧而不說。

△次序經體

疏瓊林玉沼直顯於心源。壽量光明。全彰於自性。
鈔瓊林玉沼畧舉所說依報。從七重欄楯去。至寶
樹寶網。出微妙音。一節經文。壽量光明。畧舉所說
正報。從彼佛何故號阿彌陀去。至但可以無量無
邊阿僧祇說。一節經文。直顯於心源。全彰於自性。
二句正序其體。蓋此經以實相印而爲正體。無相
不相。相而無相。名爲實相。夫瓊林玉沼。壽量光明。
固一切諸法之相也。然則直顯於心源。全彰於自
性。顧何相之可得哉。此正無相不相。相而無相之

正體。惟心淨土本性彌陀之妙也。第言之雖易。理亦難精。玄悟指歸必有至當。試欲明之。非天台法性之宗而不可。何也。蓋極樂國土遠在十萬億刹之外。阿彌陀佛乃智斷圓滿清淨具足果人。博地凡夫。污染於三惑。沉淪於二死。造無窮之業繫。作不盡之生因。何能頓感彌陀卽生淨土。橫截五道。便階不退哉。正由一家之談。眾生法性。厥義有三。一曰性量。則周遍於十方。而互徹無外。十萬億刹外之極樂。在吾性量方近。乃至一隅。一曰性體。則常住堅凝者。清淨皎潔。彌陀智斷圓滿之覺體。

與吾性體。正究竟而無差。一曰性具。然若但云無外無差。而不知有性具法門。雖曰無外。而終成有外。雖曰無差。而終成有差。且不知性量性體之德。從何故而周遍。依何法而清淨。當知有性具者在。則向之言體德體量者。皆吾性具爲之本也。三性之旨。具如生無生論中發明。茲不繁列。

△三、序宗要

疏眾聖同處。非少善之得生。七日持名。在一心之不亂。

鈔下釋題五章中。以信願淨業爲一經宗要。今括

經文。取畧敘之。但言淨業蓋三要中。此居其正故也。初句卽經云。彼佛有無量無邊聲聞弟子。皆阿羅漢。非是算數之所能知。諸菩薩眾亦復如是。又曰極樂國土。眾生生者。皆是阿鞞跋致。其中多有一生補處。其數甚多。非是算數之所能知。但可以無量無邊阿僧祇說。又曰眾生聞者。應當發願。願生彼國。所以者何。得與如是諸上善人。俱會一處。次句卽經云。不可以少善根福德因緣得生彼國。故曰眾聖同處。非少善之得生。三四句卽經云。若有善男子。善女人。聞說阿彌陀佛。執持名號。若一

日若二日乃至若七日。一心不亂。正以瓊林玉沼。
直顯於心源。壽量光明。全彰於自性。眾生從無始
已來。昏動因緣。漂流五濁。莫返一真。今將返本還
源。莫先照昏寂動。七日持名。所以照其昏也。一心
不亂。所以寂其動也。昏動苟忘。不眞何待。譬如塵
淨鏡明。風恬浪靜。然七日持名。便階不退者。正顯
教屬圓頓。不待一生。願力弘深。慈悲與拔。本功德
力不可思議。誠速出生死之要津。行菩薩道之亨
衢也。

△四序力用爲二。初、正明力用。

疏事理體一。生佛原同。無緣之慈。不謀而應。

鈔此經以離苦得樂爲用。卽經云。其人臨命終時。阿彌陀佛與諸聖眾。現在其前。是人終時。心不顛倒。卽得往生。阿彌陀佛極樂國土。是則此之力用。關乎與拔。與拔之功。在乎感應。眾生以一心持名。爲感。彌陀以拔苦與樂爲應。拔苦之道。本于悲。與樂之道。本于慈。悉係天性相關。毫非勉強。行人則以事理體一。生佛原同之道。爲感。彌陀則以無緣之慈。不謀而應之道。爲應。豈非彌陀以不來而來。來此娑婆。接引行人。行人以不往而往。往彼極樂。

觀禮彌陀此實一經力用所憑之理本也。

△次所發功勲

疏了惟心之本具。億刹非遙。知大願之可憑。三祇橫截。

鈔前文既先明力用之理本矣。憑之而念佛求生。能了事理體一。生佛原同。則十萬億刹之遐方。皆我惟心本具。雖遠不遠。能知無緣之慈。不謀而應。則四十八種之大願無緣可憑。識流可截。如是力用。豈不勝乎。言三祇橫截者。此明超出三界。有橫豎二義。若婆沙論。明三藏菩薩三阿僧祇劫修六

度萬行。百劫種相好因。然後階不退轉。獲五分法身。此從豎出。自下昇高。如兔馬渡河。紆迴曠久。若依此經求生極樂者。若已生。若今生。若當生。皆得不退轉於阿耨多羅三藐三菩提。又曰。眾生生者。皆是阿鞞跋致。此從橫出。卽此達彼。如香象截流。一念可獲。故此力用。最爲殊勝。

△次序註解之由二。初、正序三。初、序廣解之由。

疏 經文簡約。佛旨玄微。持誦雖多。研詳實寡。

鈔 此經不出千言。備詮惟心淨土。本性彌陀之旨。可謂經文簡約。佛旨玄微矣。況彌陀世尊偏與娑

婆眾生有緣故聞此法門。莫不欣然頂受。兼之此經言簡易持。逗機易信。是以若僧若俗。莫不讀誦受持。第文顯可窺。而理深罕究。致令佛意反晦而不彰。則前賢之解。又不得不廣也。

△次序略解之由

疏惟前賢之著述。嗟末俗之罕聞。

鈔前賢著述如序後別列。若慈恩孤山等諸師。各有著述。或文辭繁廣。或義理深微。不便初機。故末俗罕聞。則今之畧。又不得不不出也。

△三正序畧解爲二。初序謙光。

疏竊效流通略申援引。

鈔流通者。金光明疏云。流名下澍。通名不壅。欲使正法之水。從今以澍當。聖教筌蹄。不壅于來世。大師謙言。私竊倣效古人之流通大法。是故畧申援引諸解成言。以爲畧解。然於其間。或用義。而不用辭。畧義而不畧意。以成一家之言。如出一人之筆。可謂善乎。著述者也。

△次序己志願

疏願與同志普結淨緣。咸契無生同登不退云爾。
鈔初二句。乃以私解而公人。與同志者。廣結佛國。

清淨之緣。次二句。乃以己欲而施眾。與同聞者契。登無生不退之位。正菩薩自利兼人之志。開士大悲曠濟之懷也。

△二、傍序


疏唐慈恩法師造彌陀通讚一卷。宋孤山淨覺靈芝諸師皆有疏記。三衢倫師古厓新師皆有集註。今欲從畧以便初機。故茲別出。各從其志。

鈔唐慈恩下序古師註。今欲從下序己所註。此經持誦旣廣。註疏必多。今之所引涉于見聞者。屈指六師而已。以余近所見者。又有宗月溪法師之科。

註。國朝洪武間。普智法師之科釋。近今蓮池法師之疏鈔。若從簡畧。則此解爲最。願求博覽。亦各從其志也。

易經 十二金

Ti



彌陀畧解圓中鈔卷上

明永樂吳郡沙門大佑解

天啟天台沙門傳燈鈔

△次釋解文分二。初釋題解。次釋經解。初又二。初題解。二譯人。初題解。又二。初標題。

佛說阿彌陀經

△二、分科

○釋經爲二。初釋經題。二釋經文。初中二。初正釋題。二譯人號。今初

△子科爲二。初總標。

疏釋此經題。五重玄義。準孤山法師。以兩土果人。爲名。方等實相爲體。信願淨業爲宗。捨苦得樂爲用。生酥大乘爲教相。

鈔五重者。名。體。宗。力。用。教相也。玄者。幽微難見也。義者。深有所以也。此天台智者大師。深得佛心。洞明經旨。未釋經文。先以經中幽微難見。深有所以之旨。以釋經題。使人一覽經題。卽知經義。蓋名者。經之名也。體者。經名所詮。衆生之心體也。宗者。行也。全性體。以起觀行。全觀行。以歸心體之宗要也。力用者。經之體宗。生善滅惡之大用也。教相者。明

如來五時說法之進否也。意使學者因名以尋心體。因體以立宗要。斷疑而生信。生善而滅惡。善知大小偏圓。不致謬濫經旨也。

△二別釋爲五。初釋名。二初標。

疏初釋名

△二釋三。初釋今題。二初通別各釋。二初釋別題。二初約能說所說釋。二初釋佛說二字。二初二字合釋。

疏佛說者。釋迦教主。四辯宣演也。

鈔佛乃極聖之通號。舉其別號。乃娑婆世界釋迦

教主也。具云釋迦牟尼此云能仁寂默。能仁是其用。寂默是其體。今智在于說。乃其敎用。故畧體從用。號曰能仁。謂能其仁而利益三界也。四辯者。一、義無礙辨。謂知一切諸法義理通達無滯。二、法無礙辨。謂通達一切諸法名字分別無滯。三、辭無礙辯。謂於諸法名字義理隨順一切眾生殊方異語爲其演說。能令各各得解。辨說無滯。四、樂說無礙辨。謂隨順一切眾生根性所樂聞法而爲說之。圓融無滯。佛凡說法。以此四無礙辨才而宣演之。故曰佛說。

△二二字各釋二初釋佛字。

疏梵語佛陀。華言覺者。十號之一。究竟覺了諸法實相。名圓滿覺。

鈔題稱爲佛。梵語猶畧。具云佛陀。華言覺者。此則屬人。若單云佛。華翻爲覺。此則屬法。通號有十。一、如來。二、應供。三、正徧知。四、明行足。五、善逝。六、世間解。七、無上士。八、調御丈夫。九、天人師。十、佛。十號具足爲世間尊。究竟覺了等者。此指天台六卽判佛中此當第六究竟卽覺也。六卽者。一、理卽覺。二、名字卽覺。三、觀行卽覺。四、相似卽覺。五、分真卽覺。六、

究竟卽覺。六故凡聖不濫。免生上慢。卽故初後不二。免生退屈。一理卽覺者。諸法實相。一心圓具。皆盲不減。倒惑無虧。故無機子頌云。動靜理全是。行藏事盡非。冥冥隨物去。杳杳不知歸。名理卽覺也。二名字卽覺者。從善知識。或修多羅。聞三寶名。知四諦字。全體卽是。毫髮無差。故無機子頌云。方聽無生曲。始聞不死歌。今知當體是。翻恨自蹉跎。名字卽覺也。三觀行卽覺者。全三諦理。起三觀修。圓伏五住。入五品位。故無機子頌云。念念照常理。心心息幻塵。徧觀諸法性。無假亦無真。名觀行卽

覺也。四相似卽覺者。治未成器。粗垢先落。見相似理。獲六根淨。故無機子頌云。四住雖先脫。六塵未盡空。眼中猶有翳。空裏見花紅。名相似卽覺也。五分真卽覺者。分破無明。分見佛性。百界作佛。八相成道。故無機子頌云。豁爾心開悟。湛然一切通。窮源猶未盡。尚見月朦朧。名分真卽覺也。六究竟卽覺者。無明破盡。三德功圓。窮源到底。稱無上士。故無機子頌云。從來真妄是妄。今日妄皆真。但復本時性。更無一法新。名究竟卽覺也。

△二、釋說字二。初、詁訓釋。

疏說者。悅也。得機而說。稱悅佛懷。

鈔四明云。悅是暢悅。懷是心懷。若論此經。即是如來久修久證。念佛三昧。蘊之在懷。今機叩發。說之乃暢昔之所懷。

△二、簡異釋

疏又經通五人共說。揀異菩薩。天。仙。化人。故言佛說。

鈔五人皆能說經。若請佛印。皆可流傳。揀非四人。故標佛說。

△二、釋阿彌陀二初翻梵。

疏阿彌陀此云無量壽。

鈔阿彌陀三字梵語。此方翻爲無量壽。

△二釋義二。初釋無量壽。二。初引經釋。

疏經云。彼佛壽命。及其人民。無量無邊阿僧祇劫。

鈔彼佛壽命舉其化主。及其人民。舉其眾生也。彼國淨土。雖有其民。而無其王。以其人民。各各調善自居。不須文武兼治。故無其王。但有佛爲化主。法王而已。大凡化主壽命。隨其國土人民。以爲長短。彼國人民。尙然壽命無量。況佛壽命而有量乎。此則舉民顯主。佛壽無量。

△二況勝釋

疏以應身無量而天人莫知其數。況法報耶。

鈔法報應三身各有壽量者。夫壽依命立。命藉身持。經既言壽必有身量。故天台大師觀經疏釋題無量壽明三身三壽三量云。法身師軌法性還以法性爲身。此身非色質亦非心智非陰入界之所攝持。強指法性爲法身耳。法性壽者非報得命根亦無連持。強指不遷不變名之爲壽。此壽非長壽亦非短壽無延無促。強指法壽同虛空量。此卽非身之身無壽之壽不量之量也。報身者修行所感法

華云。久修業所得。涅槃經云。大般涅槃。修道得故。
如如智。照如如境。菩提智慧。與法性相應。相冥。相
應者。如函蓋相應。相冥者。如水乳相冥。法身非身
非不身。智既應冥。亦非身非不身。强名此智爲報
身。法壽非壽。非不壽。智既應冥。亦非壽非不壽。强
名非壽爲壽。法量非量。非無量。智既應冥。亦非量
非無量。强名無量爲量也。應身者。應同萬物爲身
也。應同連持爲壽也。應同長短爲量也。智與體冥
能起大用。如水銀和真金。能塗諸色相。功德和法
身處處應現往。能爲身非身。能爲常壽。爲無常壽。

能爲無量。能爲有量。有量有二義。一爲無量之量。二爲有量之量。如七百阿僧祇。及八十等。是有量之量。如阿彌陀。實有期限。人天莫數。是有量之無量。應佛皆爲兩量。逐物隨緣。參差長短。然此三身三壽。不可並別。一異卽乖法體。卽一而三。卽三而一。乃會玄文。今文乃以應壽。而況顯法報。以是之故。而經題稱爲無量壽也。

△次釋無量光二。初別翻。

疏亦云無量光

△二引經

疏經云。彼佛光明無量。照十方國。無所障礙。

鈔此亦無量壽佛應身之光。以光而例壽。應亦可論三身。謂法身非身。非不身。則法光非光。非不光等。今是應身之光。尙然無量。照十方國。無所障礙。況法報光耶。

△二、約通號別號釋二。初。正釋。

疏又佛是通號。阿彌陀是別號。

鈔諸佛皆有通別二號。今此經題。釋迦但舉其通。彌陀但舉其別。

△二、釋疑

疏釋迦是此方教主。庶物咸知。故舉通號。彌陀是極樂導師。理須表顯。故彰別號。

鈔或有疑云。諸佛旣有通別二號。經題何不兩土化主。通別並舉。應云釋迦佛說阿彌陀佛經。故解中釋其疑云。釋迦是此方教主。眾生無不聞知。故但舉通號。以該其別。彌陀是極樂導師。不表其別名。則不顯。故彰別號。以該其通。譯人爲省重繁。存畧雅得其所也。

△二、釋通題二。初、約法常釋。

疏經者法也。常也。十界同遵。三世不易。

鈔法常之釋。乃依觀經疏。轉釋又依妙宗鈔。謂儒經講解。有茲二訓。萬代軌則。故訓法也。百王不易。故訓常也。佛經亦然。十界咸軌。三世不易也。

△二、以由義釋

疏由聖人金口所宣。故言經也。

鈔妙宗鈔云。由佛大聖金口。宣吐自證之法。故名爲經。

△二、通別合釋二。初、指通別二名。

疏又經是通名。佛說等是別名。

鈔妙宗云。通名者。頓說漸說。施權開權。律論之外。

皆名爲經。故稱通也。別名者。別相乃多。今從三種。謂人法譬。單三複三。并具足一。以成七別。單三者。單人。如阿彌陀經等。單法。如大般涅槃經等。單譬。如梵網經等。複三者。人法。如文殊問般若經等。法譬。如妙法蓮華經等。人譬。如如來師子吼經等。人法譬具足者。如勝鬘師子吼一乘大方便方廣經等。以此七別與通合標一代佛法。

△二、明通別所以五。初、通論一化。

疏經有三種。謂教行理。依教修行。從行顯理。

鈔妙宗云。今家釋題約通別論者。以其二者各具

教行理也。若無此三。徒論通別。無所以矣。何以故。
蓋依教而後修行。從行而後顯理故也。

△二、別指今題

疏佛是覺義。約修成說。故屬於行。說卽是教。阿彌陀是理。

鈔今題佛字。判屬於行者。以佛是覺義。有自覺覺他。覺行圓滿之義也。約修成邊說。故屬於行。說字屬教最分明。阿彌陀判屬於理者。以是本性彌陀故。正當行者稱念修行。斯得見故。故判屬於理。

△三、判其通別

疏與眾典不同。則三經皆別。以對經字。則三經皆通。

鈔與眾典不同。則不惟五字成別。卽教行理。三經皆別。以對經字。則不惟一字成通。卽教行理。三經皆通也。

△四、結成秘密藏

疏理卽法身。行卽般若。教卽解脫。三一圓融。不可思議。名秘密藏。

鈔今家凡是經題。皆約通別釋者。正欲明各各具三經也。各具三經者。又正欲明具秘密藏也。如一

題阿彌陀三字。卽我行者法身本性也。佛之一字。
卽全性起修之般若智慧也。說之一字。卽智與法。
身所得之解脫也。又理。卽全苦道。卽法身。正因佛
性也。行。卽全惑道。卽般若。了因佛性也。教_卽全業道
卽解脫緣因佛性也。如是三德。如世伊三點。天王
三目。不縱不橫。不並不別。乃不可思議秘密之藏。
經題義理微妙。若此講者。聽者安可忽諸。

△五、結成功德

疏故聞首題名字。獲無量功德也。
鈔如金光明及諸大乘。多作此說。

△二、出本名

疏此經本名稱讚不可思議功德。一切諸佛所護念經。

△三、辨譯異二初總標

疏傳至中華。凡二譯。

△二、別明二初唐譯

疏唐譯云。稱讚淨土佛攝受經。

△二、秦譯二初與唐辨異。

疏今秦本隱畧經題在六方佛後。卽云汝等眾生當信是等。

鈔唐譯則存本名。而秦譯不存者。以其隱畧在六方佛後故也。

△二、讚秦譯善巧

疏以此經正示持名方法。况彌陀聖號。眾所樂聞。用此立題。人多信受。故得四海同遵。流通無盡。譯人之善巧也。

鈔大凡立名。貴生物善。今所生善則有二種。一以此經正示持名方法。一以彌陀聖號。眾所樂聞。故用此立題。人多信受。是以唐譯者。秘于大藏。而不見不聞。秦譯者。四海同遵。而流通無盡。譯人善巧。

信而有徵矣。

△二、辨體二。初標

疏二、辨體

鈔二、辨體者。卽前總列中云。方等實相爲體也。方等實相有二義。一此經說在第三方等時。方等四教並談。此經屬圓。揀異此經實相。非華嚴般若。法華三時之實相。故云方等。一圓教實相。門門可入清涼池。故方生佛均有平等不二。故等觀經疏云。體是主質。妙宗鈔云。名傍是賓。體正是主。名是假名。體是實質。一切名下皆有其質。今辨假名下之

實質也。

△二、釋二。初引論明體

疏智度論云。諸大乘經通以一實相爲經正體。

鈔妙宗鈔云。諸法不生不滅。非有非無。無能無所。

離言說相。離名字相。離心緣相。離此等相。名爲實相。無相之相也。若以彼義會歸此經。則前段七重欄楯去。至聞是音者。皆生念佛念法念僧之心。是明惟心淨土。序云。瓊林玉沼。直顯於心源是也。中段。彼佛何故號阿彌陀去。至但可以無量無邊阿僧祇說。是明本性彌陀。序云。壽量光明。全彰於自

性是也。瓊林玉沼是明依報。該得四種淨土。壽量光明等是明正報。該得佛菩薩九品往生之人。此正法華。惟佛與佛乃能究盡諸法實相。天台所謂性具三千。無非實相之體也。

△二、結成所詮

疏卽所詮之理也

△三、明宗二初標

疏三、明宗

△二、釋二初引經證成。

疏經云。若有信者。應當發願。生彼國土。

鈔前總列中云。信願淨業爲宗。故今引經証成。若有信者。卽信門也。應當發願。卽願門也。若欲証成淨業行門。應具引下文。七日持名。一心不亂。求生淨土。此爲三要之門。信則信有。惟心淨土。本性彌陀。如來願力。皆得往生。此當十乘中。第一觀不思議境也。雖有其信。若無其願。則不得生。蓋彌陀旣以願力而攝生。我當誓願而求往。方得天性相關。任運與拔。猶如磁石。自然吸取。十乘往判。此當第二真正發菩提心也。四弘中。當佛道無上誓願。成該得前之三願。雖有其願。若無行門。其願則狂。故

須七日持名。一心不亂。十乘往收。此當第三善巧。安心止觀也。七日持名。卽是觀。一心不亂。卽是止。方持名而一心。方一心而持名。是則止觀雙照。亦復雙遮。善巧安心。方得成就。畧標上根三法。其餘七乘。皆在中矣。

△二、結成宗要

疏一經之宗要也。

△四、明用二初牒

疏四、論用

△一、釋二初引經証成。

疏經云。卽得往生。極樂國土。皆不退轉於無上菩提。

提。

鈔初二句。卽示以七日持名。一心不亂後之文。次一句。卽此前經云。眾生生者。皆是阿鞞跋致之文。前總列中云。捨苦得樂爲用。卽經云。卽得往生。云云之文。若以後足前。則眾生生者。皆娑婆念佛之人。必得不退菩提。以此二文合証。此經之力用也。

△二、結成力用

疏離生死苦。得解脫樂。此經之力用也。

鈔餘之法門。莫不皆令眾生。堅出三界。離生死苦。

得解脫樂。如重臺九級。自下升高。力勝則進。足疲則墮。其登也難。惟淨土法門。令眾生橫出三界。離生死苦。得解脫樂。家庭咫尺。從東至西。舉目可觀。彈指卽到。其去也易。經之力用。豈不大乎。

△五、判教相二、初、總標。

疏五、判教相

鈔教者。聖人被下之言。相者。分別異同。如來五時設教。適時而進。大小漸頓。各有區分。天台約五時。而分別之。各有攸存。故凡釋經。皆須判教。

△二、釋相

疏部屬大乘方等教攝。二藏明義菩薩藏收。漸頓分之。此屬頓教。

鈔判此教相而有三說。部屬大乘方等教攝者。第一、約時判也。前總列云。大乘生酥爲教相。生酥卽方等時也。天台大師用涅槃五時。生起次第以判如來一代之教。初從牛出乳。譬從佛最初三七日說華嚴經。次從乳出酪。譬從十二部出九部修多羅。十二年中說小乘四阿含經。次從酪出生酥。譬從阿舍出方等。八年之中說維摩大集楞嚴楞伽十六觀。并此經等。彈偏斥小歎大褒圓。聲聞之人。

得彈訶益恥小慕大出入無難如小乘偏空出三
界外無身無土今則特告身子而云彌陀有土菩
薩有身眾生生者皆不退轉卽其事也次從生酥
出熟酥譬從方等出般若二十二年說大品般若
等諸經以空慧水洮汰二乘執情令須菩提等轉
教般若付財融通次從熟酥出醍醐譬從般若出
法華涅槃九界三乘會權授記無小無大皆令作
佛今是第三生酥故曰部屬大乘方等教攝二藏
明義菩薩藏收者第二約藏判也蓋佛所說經有
聲聞藏卽爲諸二乘人說者明理但至眞諦明惑

但破見思。明智但修空觀。明果無身無土。今經既
明出娑婆外。別有淨土。則果報有乎身土。豈不理。
惑智果。皆屬菩薩藏收。漸頓分之。此屬頓教者。第
三、約敎判也。化儀之敎。有漸有頓。漸則經劫修行。
方階不退。頓則卽生成辦。位至阿鞞。故結成云。以
令凡夫不退菩提。然而令其卽生位階不退。固是
圓頓法門。亦必須先開圓解。而次修圓行。破三惑。
而方證圓果。以階不退。今則但說彼土依、正二報。
以之爲開解生信。七日持名。一心不亂。以之爲造
修行門。臨命終時。卽得往生。以階跋致。自非釋迦。

之善權。彌陀之願力。行者之宿根。現前之三要。一
心不亂。而三惑圓伏。頓斬業根。而直往無前。安能
克此。故知此經爲五濁惡世之無上醍醐。涅槃經
云。置毒生酥中。食卽殺人。可不信諸。

△二、譯人二、初、標名

○二、譯人號

姚秦三藏法師鳩摩羅什奉詔譯

△二、解義三、初、明其生處。

疏鳩摩羅什。此云童壽。龜茲國人也。

△二、明其翻譯

疏後秦姚氏據長安。尊爲國師。弘始年間。譯諸經論。

鈔姚秦者。簡非贏秦。苻秦。乞伏秦。今是後秦姚氏也。以弘始三年。方入長安。秦主勅僧䂮等八百沙門。諸受什旨。於草堂寺。所譯經論。凡九十八部。合四百二十一卷。僧叡。僧肇。道常等。筆受。

△三、證其功德

疏南山感通傳云。七佛以來。譯經師。

鈔過去七佛。皆生於西天竺。迦維羅衛國。滅度之後。或正法。或像法時。西天梵筭。必傳流震曰。譯梵

成華譯經之師。厯代皆有。惟什師自七佛以來。常爲我震旦譯經之師。此乃南山律師問費氏天人所說。又有云。什師位證三賢。是知非聊爾人也。

△二、釋經文二。初、總別科判。二、依科解釋。今初二。初、總科三分。

○一二、釋經文三。從初至大眾俱爲序分。從爾時佛告至六方後。徵釋經題爲正宗分。從汝等皆當信受我語。盡文爲流通分。

鈔漢明以來經至震旦。弘法之師。隨文講解。無有科判。至晉道安法師。方判大小諸經。皆有三分。謂

序。正流通後。西天親光論至。與其三分義同。又此方出家之士。自漢以來。皆隨師姓。如三支之類。後道安法師。謂旣捨俗姓。以從釋迦。宜合一切。俱從釋姓。後增一阿含至。世尊果云。萬流入海。同一鹹味。四姓出家。同稱釋氏。故後人讚道安法師云。分經雅合於親光。釋姓頗同於增一。

△二、別明二序

疏諸經皆有通、別二序。此經但有通序證信。而無別序發起。卽十二部經中。無問自說也。

鈔通、別二序者。通者同也。如是等六事。諸經皆同。

故別者異也。諸經發起之緣各各不同。故今經但有通序而無別序者。乃如來無問自說。蓋淨土法門。若被菩薩之機。正所當對。必須假問而說。如十六觀經。是其類也。但此一經是對小乘及凡夫機。令知微妙身土。卽生可獲。原非小乘凡夫境界。豈能問之。故如來無問自說。稱性宣揚。何須發起。

△二、依科解釋三。初、釋序分二。初、分科

○序分分二。初、五句證信。

鈔證信者。佛將滅度。阿難咨問。一切經首。當安何語。佛答云。當安如是我聞等。豈惟我然。三世諸佛。

經初皆爾。

△二、釋經二。初、五句證信二。初、列經

如是我聞。一時佛在舍衛國祇樹給孤獨園。

△二、釋義五。初、釋所指法體。

疏如是者。指所聞之法體也。實相之理。古今不異名如。如理而說爲是。

鈔如是者。指法之辭。所指者。卽所聞法體。實相之理。如此之理。古今不異。名如。卽真如。不動之體。亘萬古而恆新。歷千差而不改。如來能稱此理而說。無不當理。故稱如是。

△二、釋所顯能聞

疏我者。阿難結集法藏。自言如是法門。我從佛聞。
鈔佛地論云。謂結集時。共請言。如汝所聞。當如是說。傳法菩薩。便許可言。如是當說。如我所聞。

△三、釋所明機感

疏一時者。機應和合之時也。不言某年月日者。二土正朔不同故也。

鈔機。卽阿難與千二百人。并菩薩等眾。應卽釋迦如來。能說教主。機無應而不成。應無機而不就。砧椎相叩。乃方成法器。機應合一。則此經方說。二土

正朔不同者。如此土四時。彼方三際。東夏以合朔爲月旦。西方以既望爲月旦。兩方旣爾。四夷可知。旣難準定。故但言一時。

△四釋所稱化主

疏佛者。覺也。自覺。異凡夫之不覺。覺他。異二乘之獨覺。覺滿。異菩薩之在因。眾聖中尊。故名曰佛。卽釋迦教主也。

鈔梵語佛陀。此云覺者。謂覺了性相眞妄之者。卽究竟本覺。亦究竟始覺。自覺異凡夫之不覺者。凡夫則終朝昏擾。逐妄漂流。如來則寂照雙融。還源

返本覺他異二乘之獨覺者。二乘則覺了生死。如
麤獨跳。如來則自登彼岸。慈航度人。覺滿異菩薩
之在因者。菩薩則三覺雖修。而三因未滿。如來則
三覺究竟。而三德圓彰。爲二乘菩薩眾聖中尊。故
稱爲佛。以通從別。卽娑婆教主釋迦牟尼佛也。

△五、釋所述住處二。初、釋舍衛國

疏舍衛正云室羅筏悉底。此云聞物。言人物富庶
遠聞諸國故。

鈔人物富庶者。謂此國具足欲塵財寶之物。多聞
解脫之人也。

△二釋祇樹給孤獨園二。初出二人名德二。初祇陀

疏梵語祇陀此云戰勝波斯匿王太子名也。

鈔波斯匿王太子初生之時適與外國戰勝因立美名。

△二須達

疏梵語須達此云善施長者名也能惠施國之窮民名給孤獨。

△二明二人並稱

疏側布黃金從祇陀買園建立精舍請佛說法祇

陀施樹故並稱也。

須達長者爲兒聘婦。往王舍城得見如來。請佛供養。佛命身子同往相地。惟祇陀太子園林茂盛。可造精舍。祇陀戲許須金磚側布其地。金錢掛滿其林。便當與之。須達歡喜。命車載金。布地將滿。祇陀見其精誠。便云。地當屬卿。林屬於我。共施供佛。不亦可乎。故後凡於此地說經。經家序處必美二人之德而並稱之。

△二列眾同聞二初分科。

○二列眾同聞三初聲聞眾三初示數

△二釋經三。初聲聞眾三。初示數二。初列經。
與大比丘僧十二百五十人俱。皆是大阿羅漢。眾所
知識。

△二解義爲四。初釋明類。

疏比丘此云乞士。乞食資身。乞法鍊心。又云怖魔。
又云破惡。僧者。具云僧伽。此云和合眾。

鈔比丘梵語而含三義。一乞士。外於檀越乞食。以
資色身。永離四邪。內於如來乞法。以鍊心性。常趣
八正。應供之因也。二破惡。能破九十八種煩惱惡
因。能破二十五有生死惡果。殺賊之因也。三怖魔。

發心出家。魔王怖其出境。精進修行。波旬怖其離欲。無生之因也。和合眾者。凡爲僧者。須具六和。一戒和同修。二見和同解。三身和同住。四利和同均。五口和無諍。六意和同悅。具此六和。方可稱僧。

△二、釋示數

疏三迦葉有千弟子。舍利自連其二百五十人。最初歸佛。常隨眾也。

鈔三迦葉者。一、優樓頻螺迦葉。二、伽耶迦葉。三、那提迦葉。若最初度憍陳如五人。合云千二百五十五人。經舉大數。是故畧之。得食甘露。莫先於此。故

爲常隨眾也。

△三、釋顯位

疏阿羅漢含三義。一、應供爲人天福田乞士果也。二、殺賊斷煩惱盡破惡果也。三、無生不受後有怖魔果也。

鈔比丘因名也。阿羅漢果號也。因果二名。一一主對。如影隨形。畧無差忒。故爲比丘。有乞士之因。方獲羅漢應供福田之果。有破惡之因。方獲斷煩惱盡殺賊之果。有怖魔之因。方獲無生不受後有之果。

△四、釋歎德

疏聞名欽德曰知。覩形敬奉曰識。

鈔若但聞名而未覩形。則知而未識。但覩形而不聞名。則識而未知。今既聞名而覩形。必欽德而敬奉。阿難尊者與此輩等同聞。非惟見同列之德齊。亦乃顯所聞之法真。以之証信。誠可信也。

△二、列名二。初牒科

○二、列名

△二、釋經二。初、列經

長老舍利弗。摩訶目犍連。摩訶迦葉。摩訶迦旃延。摩

訶拘絺羅。離婆多。周利槃陀伽。難陀。阿難陀。羅睺羅。
憍梵波提。賓頭盧頗羅墮。迦留陀夷。摩訶劫賓那。薄
拘羅。阿菴樓駁。

△二釋義二初釋長老

疏耆年碩德通稱長老

鈔此諸聖僧有耆年者必有碩德。有碩德者未必
定是耆年。故長老者乃耆年與碩德之通稱也。

△二釋眾名十六初釋舍利弗。

疏舍利弗。此云身子。其母身容端正。眼如鷺鷥。兼
母名之。故又云鷺子。智慧第一。

△二、釋目犍連

疏摩訶目犍連。此云大采菽姓也。其族眾多。故以大別之。神通第一。

△三、釋大迦葉

疏摩訶迦葉。此云大龜氏。其祖感靈龜負仙圖而出。遂以名族。又云飲光身光赫奕。映蔽餘光。毘婆尸佛時爲治金師。貧女以金珠同修塔像。從是以來身光金色。

△四、釋摩訶迦旃延

疏摩訶迦旃延。此云文飾。論議第一。

△五、釋摩訶拘絺羅

疏摩訶拘絺羅。此云大膝。從狀得名。舍利弗母舅。

△六、釋離婆多

疏離婆多。此云星宿。父母禱星而生。遂以爲名。

△七、釋周利槃陀伽

疏周利槃陀伽。此云繼道。其母省親。生於路傍故。姿性魯鈍。惟誦半偈。證羅漢果。

△八、釋難陀

疏難陀。此云善歡喜。佛之親弟也。

△九、釋阿難陀

疏阿難陀。此云慶喜。白飯王之子。佛之堂弟也。佛成道日生。舉國忻慶。因立嘉名。多聞第一。

△十、釋羅睺羅

疏羅睺羅。此云覆障。本修羅之名。能障日月。佛爲所障。不卽出家。故以爲名。

△十一、釋憍梵波提

疏憍梵波提。此云牛啞。宿生爲牛。食已轉哨。故受此名。

△十二、釋賓頭盧頗羅墮

疏賓頭盧。此云不動。名也。頗羅墮。此云利根。姓也。

別譯云賓度羅跋囉墮闇。

△十三、釋迦留陀夷

疏迦留陀夷。此云黑光。其形粗黑故。

△十四、釋劫賓那

疏摩訶劫賓那。此云房宿。母禱房屋而生。

△十五、釋薄拘羅

疏薄拘羅。此云善容。形貌端正故。昔施僧一訶梨勒。感五不死報。

△十六、釋阿窓樓馱

疏阿窓樓馱。此云無貧。昔於饑世。以稗飯施辟支

佛九十一劫果報充足天眼第一

鈔諸經列眾皆有歎德。如法華楞嚴是其例也。惟

此經無之。非無也。蓋譯人善巧。令顧名而思義也。如大智舍利弗。摩訶目犍連等。顧何德而不彰。然諸經歎德必隨緣起。如阿難以邪染之緣。浚發楞嚴。而經家歎德特曰。佛子住持善超諸有。二云同同

列之眾。既有是德。正顯當機。雖托緣于邪染而實無是過也。此經餘諸弟子。且無暇論。卽大智舍利弗。位居其首。次之以大目犍連。摩訶迦葉。摩訶迦旃延。三人者。豈無意乎。蓋極樂法門。微菩薩實智。

而莫能信。微菩薩大神通而莫能往。微抖擗三惑而莫能淨。微四無礙辯而莫能論。此經說在方等意令聲聞迴小智以成大智。迴小通以成大通。迴小頭陀以成大頭陀。迴小論議以成大論議。淨土卽權而實。卽實而權者。斯可以照了實相。信受奉行。卽近而遠。卽遠而近者。斯可以不速而疾。彈指卽到。心淨土淨。卽穢而淨者。斯可以生卽無生。生化兩冥。妙有卽空。真空卽有者。斯可以妙用辯才剖析無礙。至於餘諸弟子。各有一德。以類而歎德。卽事而回向。於此法門。成方等益。了無生而生。感

界外生達無身而身受變易身堅出三界固不可思議。又有橫出三界尤不可思議也。

△三、總結二。初牒科

○三、總結

△二、釋經二。初列經

如是等諸大弟子。

△二、解義

疏學在師後故稱弟。解從師生故稱子。此總結前文也。

鈔弟則顯師之謙讓。師乃明資之尊敬。故夫子曰。

余也處回如弟。回也處余若父。

△二、菩薩眾二。初分科

○一、菩薩眾二。初明類

△二、釋經二。初列經

并諸菩薩摩訶薩。

△二、釋義

疏梵語菩提薩埵。此云覺有情。同佛所證曰覺。無明未盡曰有情。摩訶薩。此云大道心眾生。

鈔菩薩二字。梵語存畧。若具足稱之。應云摩訶菩提質帝薩埵。摩訶翻大。菩提翻道。質帝翻心。薩埵

翻眾生亦翻有情合爲大道心眾生大道心則下異眾生。有情則上異諸佛。蓋已離此岸。尙居中流。此諸菩薩乃又舉其大者。故以摩訶薩別之。

△二、列名二。初牒科

○二、列名

△一、釋經二。初列經

文殊師利法王子。阿逸多菩薩。乾陀訶提菩薩。常精進菩薩。與如是等諸大菩薩。

△二、解義爲五。初、釋文殊

疏文殊師利。此云妙德。以微妙三德同佛所證故。

亦云妙吉祥菩薩。入法正位。名法王子。

鈔微妙三德。同佛所證者。圓教始從初住。終至等覺。分破一品無明。分同佛證微妙三德。若約文殊菩薩。則有本迹之殊。本因如悲華經。對寶藏佛發弘誓願。蒙佛授記。字曰文殊。又于燈明佛所爲八王子之師。是釋迦九代之祖。昔太隣諸佛。今輔佐釋迦。若論本果。現在北方歡喜世界作佛。號歡喜藏摩尼寶積佛。未來在南方離垢世界成佛。號普現如來。本迹如此。同佛所證。厥位相齊。亦名妙吉祥者。惑業苦三。有少分在。皆未吉祥。位居究竟。三

德圓彰。故又號妙吉祥也。佛破二十五有。獲王三昧。入法正位。名破有法王。文殊以位隣妙覺。爲佛長子。名法王子也。

△次釋阿逸多

疏阿逸多。此云無勝。超出偏小。故慈氏之名也。

鈔梵語阿逸多。翻爲無能勝名也。又名彌勒。翻爲慈氏姓也。思益經云。若眾生見者。卽得慈心三昧。合而言之。是則此菩薩以地位證入隣極。慈心及物。以受姓名也。

△三、釋乾陀訶提

疏乾陀訶提。此云不休息。勤修不懈故。

鈔思益經云。恆河沙劫爲一日夜。是三十日爲一月。十二月爲一歲。過百千萬億劫。得值一佛。如是值恆河沙佛。行諸梵行。修習功德。然後授記。心不休息。故號爲乾陀訶提。

△四、釋常精進

疏常精進者。乃法性常住。成無作正勤故。

鈔大寶積經云。是菩薩爲一眾生。經無量劫。隨逐不捨。猶不受化。無一念棄捨。以身心俱進。名常精進。祇以見法性常住。成無作正勤。雖精進而無精

進相也。

△五釋總結

疏大菩薩者。廻出偏小故。

鈔靈芝云。菩薩名通初後。如是菩薩莫非深位補處。或權現影響。故稱大也。諸經列菩薩眾。亦有歎德。如法華等。是其通例。惟此經無之。非無也。亦令讀是經者。顧名而思義。仰德而受行也。何也。如文殊以妙德吉祥。阿逸多以無能勝慈氏。乾陀訶提。以自強不息。勤修無懈。常精進以悟法常住。成無作正勤。顧何德而不具。經家獨列此四人者。意令

修行淨土者。先以微妙三德。卽吾心之三諦。爲能觀三觀之本。卽所謂先觀不思議境是也。繼之以無能勝之無緣慈悲。而真正發菩提心。以表今之求生極樂者。一以化眾生。斷煩惱。學法門。成佛道。而爲初志。然後加之以全性起修。自強不息。勤修無懈。了法性常住。成無作正勤。庶捨穢能盡。取淨窮源。卽娑婆之塞。以臻乎極樂之通。則道品自然調適。對治法爾助開。九品可階。疑城不住。法愛不生。金臺可陞。得預如是等諸大菩薩之列矣。經家之意。其在是乎。

△三人天眾二初牒科

○三人天眾

△二釋經二初列經

及釋提桓因等無量諸天大眾俱。

△二釋義三初釋釋提桓因

疏釋提桓因此云能天帝。忉利天主也。

鈔梵語具云。釋提桓因陀羅。此翻能作天帝。忉利天主也。忉利此翻三十三。須彌山頂四面共八城。每城居四天。天帝居善見城中。合三十三因果莊嚴。具俱舍頌說。

△次釋無量諸天

疏無量諸天者。欲色界中諸梵天王護世四王等也。

鈔欲界有六天。地居二天。卽下四王天。并第二忉利天。空居四天。卽夜摩。兜率。化樂。他化也。色界四天初禪。二禪。三禪各三天。四禪九天。佛凡說經。皆來會集。惟無色界天。旣無色質。故不云來。

△三、釋大眾

疏兼四眾八部。故言大眾俱。

鈔四眾者。比丘。比丘尼。優婆塞。優婆夷也。八部者

天龍夜叉乾闥婆阿修羅迦樓羅緊那羅摩呼羅伽人非人等也。

△次釋正宗二初總判三科

○二正宗分三初依正莊嚴二修證行法三諸佛稱讚。

△二依經釋義二初分科

○就初爲二初總示二別釋初又二初依報莊嚴

△二釋經爲三初依正莊嚴二初總示二初依報

莊嚴二初列經

爾時佛告長老舍利弗從是西方過十萬億佛土有

世界名曰極樂。

△二、解義六。初釋爾時

疏爾時者將說經之時也。

鈔爾時卽前序分機應合一之時。惟其合一故將說經。

△二、釋當機

疏以身子利根故特告之。不俟其請問也。

鈔淨覺云。不告菩薩天龍者。應有四悉意。一、是左面弟子。大小法集多居其首故。二、由智慧第一。四眾八部罔不欽仰故。三、爲令四眾聞佛淨土自鄙

絕分故。四復欲小乘。未取證者。向小向大故。佛凡說法。必獲四悉檀益。今謂於佛說十二部經中。此當無問自說。以淨土法門。非小乘境界故。復欲令彼回小向大故。此經唯無祇夜伽陀。因緣譬喻。優波提舍。而長行直說。方廣授記。未曾有。此皆顯有。若夫本生本事。則以畧望廣於大彌陀經。亦復具有。

△二、釋界數

疏

一大千世界。稱一佛土。十疑論云。西方去此十萬億刹。爲對凡夫肉眼。生死心量而言之耳。但使

眾生淨業成就。臨終在定之心。即是淨土受生之心。動念即是生淨土時。實非遠也。

鈔解中先依經明遠。次約理明不遠。一大千世界稱一佛土者。百億日月。百億須彌。百億四大海。百億鐵圍山。名一佛土故。俱舍頌云。四大洲日月。須彌。盧欲天。梵世各一千。名一小千界。此小千千倍。說名爲中千。此千倍大千。皆同一成壞是也。如此觀之。極樂世界。去此甚遠。次引天台大師十疑論。明不遠。蓋言凡夫之人。以先世煩惱惑。善惡業報。得此生五陰苦果。所有凡夫肉眼。遠卽不見。乃以

不見者爲遠。所有生死心量遠則不知。亦以不知者爲遠。無怪其然。若念佛之人。一心不亂。則惑道伏。淨業成就。則業道清。臨終之時。娑婆印壞。則苦道脫。當爾之時。化肉眼爲天眼。變凡心爲聖心。故臨終在定之心。卽是淨土受生之心。動念卽是生淨土時。言動念者。乃垂終得見三寶。與夫見光見華等。一有所見。便名動念。非妄念之念也。雖在此土得見。已是華池受生之時。故曰實非遠也。又般舟經明眾生有三力。故得見彌陀。一者、三昧力。卽論中所明是也。二者、佛力。四十八願經云。設我成

佛。十方眾生。至心信樂。欲生我國。乃至十念。若不
生者。不取正覺。三者。本功德力。此有二義。一者。眾
生自無始來。曾有念佛求生淨土種子。當時未生。
今種已熟。應得往生。二者。眾生心性。本具塵刹。雖
十萬億之遙。無非性具。卽性體。性量。如帝網之一
珠。影含眾珠。如大海之一浪。具全潮體。非但互具。
亦乃互卽。故四明云。若心性不具塵刹。則生無感
見之功。佛無應現之理也。

△四、釋極樂

疏梵語須摩提。此云安養。或云清泰。又云極樂者。

猶言最勝也。

鈔安養者。對娑婆八苦交煎。所養者非安也。清泰者。對娑婆五濁惡世。所處者非泰也。極樂者。對娑婆眾苦之劇。所受者非樂也。

△五、出四土二。初、總標

疏一切國士。隨機所感。有乎四種。

△二、別釋四。初、寂光土

疏一、常寂光土。諸佛究竟極果所居。

鈔觀經疏云。常寂光者。常卽法身。寂卽解脫。光卽般若。是三點伊。不縱不橫。名秘密藏。妙宗鈔云。前

三在事故從居人修斷因果而立土名此土屬理故從本體三德爲名私謂鈔中旣有上品寂光之名則知彼土亦分九品惟上上品爲極果所居餘之八品皆圓聖分證人所居爲分證寂光也疏云分證究竟寂光淨穢是也

△二、實報土

疏二、實報土法身大士所居。

鈔觀經疏云。實報無障礙者行真寶法感得勝報。色心不相妨故言無障礙。純菩薩無有二乘。仁王經云。三賢十聖住果報。卽是其義。釋論云。菩薩勝

妙五欲能令迦葉起舞。華嚴云。無量香雲臺卽其土淨妙五塵。私謂諸佛亦有報土。何必定爲菩薩所居。亦可準分九品。上上品爲佛所居。餘之八品隨菩薩所破無明多少。以爲差降爾。疏云。次第頓入實報淨穢是也。

△三、方便土

疏三、方便土。三乘人所居。

鈔觀經疏云。方便有餘者修方便道。斷四住惑。故曰方便。無明未盡。故曰有餘。釋論云。出三界外。有淨土。聲聞辟支佛出生其中。受法性身。非分段生。

法華云。若我滅度後。實得阿羅漢。若不信此法。若遇餘佛。便得決了。就中復有利鈍。指上爲淨。指下爲穢也。私謂旣曰就中復有利鈍淨穢。是則準望亦分九品。圓方便道居上三品。別通方便道居中三品。藏方便道居下三品。疏云。體析巧拙。有餘淨穢是也。

△四、同居土二。初出名

疏四、同居土六。凡所居。

鈔觀經疏云。娑婆雜惡。荆棘瓦礫。不淨充滿。同居穢也。池流八德。樹列七珍。次於泥洹。皆正定聚。凡

聖同居上品淨土。

△次釋義

疏以五濁輕重而分淨穢。娑婆五濁重故兼四惡趣。輪迴不息。安養五濁輕故惟有人天皆得不退。故名極樂。

鈔以五濁下標。娑婆下釋一往言之。娑婆眾生以五濁之因重故名同居穢。是故感報兼四惡趣。此由煩惱濁中五鈍使隨其強者而牽生四趣。人天旣由戒善故煩惱稍輕安養五濁輕者由在娑婆專修淨業輕于五濁故得往生極樂受人天報況

至彼邦塵境輕清。不生煩惱。故雖人天。皆得不退。
故名極樂。再往言之。極樂國土。亦分淨穢。如觀經
九品。大本三輩。品位既分高下。所見亦自不同。故
妙宗鈔云。初五濁輕爲同居淨者。此淨甚通。須知
別意。如戒善者。四教凡位。皆悉能令五濁輕薄。感
同居淨。而圓觀輕濁。感同居淨。依正最淨。如經中
說。地觀已去。一一相狀。比于餘經修眾善行。感安
養土。其相天殊。

△六、簡別

疏盡理言之。惟究竟寂光。是真極樂。

鈔盡理言之等者此約四土展轉簡之是則分證寂光猶名穢土苦域惟究竟果人所居之土方得名爲真實極樂故前序先明真源不二云寂光真淨初無苦樂之殊此之謂也

△二、正報莊嚴二。初牒科

○次、正報莊嚴

△二、釋經二。初列經

其土有佛號阿彌陀今現在說法。

△二、釋義二。初釋三身二。初總標

疏佛有三身

△二別釋三。初法身

疏一。法性身居寂光土。身土一如。名秘密藏。

鈔觀經疏云。法身者。師軌法性。還以法性爲身。此身非色質。亦非心智。非陰界入之所攝持。強指法性爲法身耳。妙宗鈔云。師軌釋法。捨通從別。通則生佛俱軌法性。然其九界。雖軌而違。如人依師。不順佛教。唯有諸佛。從初發心。軌法而修。今能究竟冥合法性。故大經云。諸佛所師。所謂法也。以法常故。諸佛亦常順法性故。名法爲師。實非所師。與能體別。故卽所師法。而爲其身。雖名爲身。已出五陰。

故非色質。及非心智。色是初陰。心智卽四陰。旣其非陰。亦非入界。故非三科。任持攝屬。此則已簡分段變易。以示生死陰等攝故。亦可色質簡應。心智簡報。三科簡因。旣非此等。何以狀名爲物機故。強指法性。名爲法身。此能居之身也。所居之土。正如前釋。

△二、報身

疏二者報身居實報土。

鈔觀經疏云。報身者修行所感。法華云。久修業所得。涅槃云。大般涅槃修道得故。如如智照如如境。

菩提智慧。與法性相應。相冥。相應者。如函蓋相應。
相冥者。如水乳相冥。法身非身。非不身。智旣應冥。
亦非身。非不身。强名此智爲報身。妙宗鈔云。報卽
酬報也。修行是因。感于妙報而酬因也。法華證智
德。經云。慧光照無量。久修業所得。大般涅槃證斷
德也。此二果德。酬答修因。是故名報。感報之時。其
相何似。故以一法二喻顯之。如名不異。所觀差別。
不名如境。智外有境。不名如智。各二如者。境如如
智。智如如境。此之境智。故得應冥。智慧名通。故以
果覺菩提簡之。卽是無上菩提之智。與法性境相

應相冥。先舉函蓋。喻其相應。恐謂函蓋雖際畔。相當終存兩相。故重舉水乳。以喻相冥。令知始本同是覺性。其體泯然。正同水乳。則顯境外無智。智外無境。水乳可見。言非身者。非應佛有分齊身。非不身者。非報佛無分齊身。又非身。則非有。非不身。則非空。中道法身。乃本覺體。始覺冥此。能冥亦忘。爲成觀故。强名報身。土義同前。

△二、應化身

疏三、應化身居不二土。隨九品機所見不同。

鈔觀經疏云。應身者。應同萬物爲身也。智與體冥。

能起大用。如水銀和真金。能塗諸色相。功德和法身。處處應現。往能爲身。非身。然此三身。不可並別。一異卽乖法體。卽一而三。卽三而一。乃會玄文。妙宗鈔云。如谷答響。大小隨聲。如鑑現形。端醜在質。應萬物。感現勝劣身。智卽報身。體卽法身。此二冥合。應用無方。真金上色。須水銀和方能塗物。闕此一緣。金無塗用。報智功德。契會法身。隨有機處。應無不往。上所說報但論冥法。卽自受用也。今明垂應。以他受用。常住之應。對于生身。無常之應。示二迹用。是故雙明身等。身卽生身。有分齊相。故名爲

身非身是報無分齊相故曰非身小般若云佛說非身是名大身大身者乃他受用身也他身者一時隨機變化而有義則同於應身體用少有差別應身則從法報冥合之體以起應用化身則從應身之體以起化用乃從用而爲用也更或從化而化則化化無窮應身則八相始終化身則倏起倏滅居不二土者報身爲能證之智法身爲所證之理是則寂光實報皆能應之體他受用土及方便同居皆應身所居之土機緣差別有乎九品故視之爲異佛應無差則寂光實報橫在三品故云不

二。應準觀經疏判九品往生人。須者往檢。又四土。
土土各分九品。隨土感見三身有異。隨機感見四
土不同。

△次釋簡異

疏現在說法。揀非過未也。

鈔下經云。阿彌陀佛成佛已來。於今十劫。則知彌
陀現在成佛。而爲眾生說法。非過去未來之諸佛
也。

△二別釋二初分科

○二別釋二初依報二初總明極樂。

△二、釋經二。初、依報二。初、總明極樂二。初、列經
舍利弗。彼土何故名爲極樂。其國眾生無有眾苦。但
受諸樂。故名極樂。

△二、釋義

疏。彼土下徵起。其國下總釋。無有眾苦者。無三途
八難等諸苦也。對娑婆極苦言之。故云極樂。

鈔。娑婆世界。具乎六道。人天修羅。名三善道。以戒
善爲因。地獄餓鬼畜生。名三惡道。以惡逆爲因。道
卽能通之義。謂一切眾生。造作善業。能通人天等
處。造作惡業。能通地獄等處。故也。又謂之三途者。

乃約果爲名。卽由惡業而通至於火途。刀途。血途也。一、地獄道。謂此處在地之下。并鐵圍山間。有八寒八熱等獄。卽造作極重惡業眾生。墮于此道。故名地獄道。二、餓鬼道。有三種。一、謂罪業極重者。積劫不聞漿水之名。其次者。但伺求人間。蕩滌膿血糞穢。又其次者。時或一飽。加以刀杖驅逼。填河塞海。卽造惡業眾生。由慳貪故。生於此道。三、畜生道。謂披毛戴角。鱗甲羽毛。四足多足。有足無足。水陸空行等。卽造作惡業眾生。由愚癡故。生於此道。八難者。八處皆障難也。此之八處。雖感報苦樂有異。

而皆不得見佛。不聞正法。故總稱爲難。一、地獄難。義釋同前。地獄之中。長夜冥冥。受苦無間。障於見佛聞法。是故名難。二、畜生難。義釋同前。畜生道中。受苦無窮。障於見佛聞法。是故名難。三、餓鬼難。義釋同前。餓鬼道中。受苦無量。障於見佛聞法。是故名難。四、長壽天難。謂此天以五百劫爲壽。卽色界第四禪中。無想天也。言無想者。以其心識不行。如冰魚蟄蟲。外道修行。多生其處。障於見佛聞法。是故名難。五、北鬱單越難。梵語鬱單越。華言勝處。謂此處感報。勝東西南三洲也。其人壽一千歲。命無

中天爲著樂故不受教化是以聖人不出其中不得見佛聞法故名爲難。六、盲聾瘡痘難。謂此等人雖生中國而業障深重。盲聾瘡痘諸根不具。值佛出世而不能見佛。雖說大法亦不能聞。故名爲難。七、世智辯聰難。謂世間之人邪智聰利者。惟務耽習外道經書。不信出世正法。故名爲難。八、生在佛前佛後難。謂佛出現於世爲大導師。令諸眾生離生死苦。得涅槃樂。人有緣者乃得值遇。其生在佛前佛後者。由業重緣薄。既不見佛。亦不聞法。故名生在佛前佛後難。等諸苦者。卽人間八苦也。一、生

苦有五種。一者受胎。謂識托母胎之時。在母腹中。窄隘不淨。二者種子。謂識托父母遺體。其識種子。隨母氣息出入。不得自在。三者增長。謂在母腹中。經十月日內。熱煎煮。身形漸成。住在生藏之下。熟藏之上。間夾如獄。四者出胎。謂初生下。有冷風熱風吹身。及衣服等觸體。肌膚柔嫩。如被物刺。五者種類。謂人品有富貴貧賤。相貌有殘缺妍醜。是名生苦。二老苦。有二種。一者增長。謂從少至壯。從壯至衰。氣力羸少。動止不寧。二者減壞。謂盛去衰來。精神耗減。其命日促。漸至朽壞。是名老苦。三病苦。

有二種。一者、身病。謂四大不調。眾病交攻。若地大
不調。舉身沉重。水大不調。舉身胖腫。火大不調。舉
身蒸熱。風大不調。舉身倔強。二者、心病。謂心懷苦
惱。憂切悲哀。是名病苦。四、死苦。有二種。一者、病死。
謂因疾病壽盡而死。二者、外緣。謂或遇惡緣。或遭
水火等難而死。是名死苦。五、愛別離苦。謂常所親
愛之人乖違離散。不得共處。是名愛別離苦。六、怨
憎會苦。謂常所怨讐憎惡之人。本求遠離。而反集
聚。是名怨憎會苦。七、求不得苦。謂世間一切事物。
心所愛樂者。求之而不能得。是名求不得苦。八、五

陰熾盛苦。五陰者。色受想行識也。陰卽覆蓋之義。謂能蓋覆真性。不令顯發也。盛卽盛大之義。謂前生老病死等眾苦聚集。故名五陰熾盛苦。對娑婆極苦言之。故名極樂者。蓋極樂眾生無有如上娑婆種種極苦之事。故名極樂。若敵顯者。極樂眾生六根所對塵境。無非微妙色聲香味觸。莫不生人觀解。信念三寶。故無三毒之因。不造惡逆之業。故無三途之苦果。無三道之障難也。聞法入定。不墮無想。故無長壽天難也。雖受極樂。常受教化。故無北俱盧洲難也。六根清淨。明利黠慧。故無盲聾瘡。

痘難也。眾生生者皆正定聚故無世智辨聰難也。
阿彌陀佛今現在說法經無量劫觀音卽補其處。
號普光功德山王佛故無佛前佛後難也。蓮苞托
質無生苦也。寒暑不遷無老苦也。身非分段無病
苦也。壽命無量無死苦也。無父母妻子無愛別離
苦也。諸上善人聚會無怨憎會苦也。天花香食自
然受用無求不得苦也。觀照陰空無蘊苦也。

△二別示莊嚴二初、分科

○二別示莊嚴五初、欄網行樹二初、列經

△二釋經 初、欄網行樹二初、列經

又舍利弗。極樂國土。七重欄楯。七重羅網。七重行樹。皆是四寶周匝圍繞。是故彼國名爲極樂。

△二、解義四。初、釋欄楯

疏欄檻也。橫曰欄。縱曰楯。莊嚴寶樹圍繞華叢也。

△次、釋羅網

疏羅網者。寶網羅覆。光色晃耀。周匝垂布。莊嚴校飾也。

△三、釋行樹

疏行樹者。觀經云。一一樹高八千由旬。七寶華葉無不具足。

△四釋四寶

疏四寶者。金銀琉璃玻璃也。

鈔大略言之。極樂寶地之上。一一珍寶樓閣之外。莫不列以寶樹。寶樹之外。繞以欄楯。寶樹欄楯之上。又覆以羅網。各以七重爲率者。所以表菩提分也。然若樹若欄若網。皆以四寶者。所以表七覺。不離四諦也。娑婆世界。王臣之家。非無此嚴。然以樹言之。不過蘿林。以欄言之。不過木石。以網言之。不過絲藤。以地言之。不過土石。以因言之。不過人力。諸天雖復同之。非若淨土之演法音。淨土穢土之。

不同。自然造作之各異。豈無其故哉。解引觀經。一樹高八千由旬。七寶華葉無不具足。以類明之。則所莊嚴不啻四寶。又可知也。今當具引大本及以觀經。一一具列。非曰好繁。亦所以助長求生淨土者之信樂耳。觀經云。觀寶樹者。一一觀之作七重行樹想。一一樹高八千由旬。其諸寶樹。七寶華葉。無不具足。一一華葉。作異寶色。琉璃色中。出金色光。玻璃色中。出紅色光。瑪瑙色中。出碑礫光。碑礫色中。出綠真珠光。珊瑚琥珀。一切眾寶。以爲映飾。妙真珠網。彌覆樹上。一一樹上有七重網。一一

網間有五百億妙華宮殿。如梵王宮諸天童子。自然在中。一一童子五百億釋迦毗楞伽摩尼以爲瓔珞。其摩尼光照百由旬。猶如和合百億日月。不可具名。眾寶間錯。色中上者。此諸寶樹行行相當。葉葉相次。於眾葉間生諸妙華。華上自然有七寶果。一一樹葉縱廣正等二十五由旬。其葉千色。有百種畫。如天瓔珞。有眾妙華作闔浮檀金色。如旋火輪。宛轉葉間。涌生諸果。如帝釋餅。有大光明化成幢幡。無量寶蓋。是寶蓋中映現三千大千世界一切佛事。十方佛國亦於中現。又大本云。復有七

種寶樹。其純一寶樹者。根莖枝葉華果。皆以一寶。二寶爲一樹者。根莖枝葉花果間。以二寶。三寶爲一樹者。根莖枝葉花果間。以三寶。四寶爲一樹者。根莖枝葉各以一寶。其花與果。同於根莖。五寶爲一樹者。根莖枝葉花。各以一寶。果則同於其根。六寶爲一樹者。根莖枝葉華果。各以一寶。七寶爲一樹者。亦復如是。惟加其節。益用一寶。如是諸樹。種種異行。行行相值。莖莖相望。枝枝相准。葉葉相向。華華相順。果果相當。如是行列。數百千重。間以寶池。亦復如是。乃至周徧世界。榮色光耀。不可勝。

視。

△二、華池樓觀二。初、分科

○二、華池樓觀二。初、正明

△二、釋經二。釋華池樓觀二。初、正明二。初、列經

又舍利弗。極樂國土。有七寶池。八功德水。充滿其中。
池底純以金沙布地。四邊階道。金銀琉璃。玻璃。合成。
上有樓閣。亦以金銀琉璃。玻璃。碑礎。赤珠。瑪瑙。而嚴
飾之。池中蓮華。大如車輪。青色青光。黃色黃光。赤色
赤光。白色白光。微妙香潔。

△二、釋義六。初、釋七寶池

疏七寶池者。觀經云。一一池水。七寶所成。其寶柔軟。從如意珠王生。

鈔七寶池從水得名。故引觀經池水從七寶成而釋。然娑婆世界。水豈無之。乃從天一而生。故體非七寶。寶豈無之。乃從戊己而生。故體非柔軟。淨土之水。柔而非陰。寶而不剛。淨穢所以異也。不特此也。彼經又云。其摩尼水流注華間。尋樹上下。正以體非天一。故不特可下。而亦可上。麤妙所以分也。又不特此也。彼經又云。其聲微妙。演說苦空。無常無我。諸波羅蜜。復有讚歎諸佛相好者。如意珠王。

涌出金色微妙光明。其光化爲百寶色鳥。和鳴哀雅。常讚念佛念法念僧。正以體卽唯心。無情說法。苦樂所以別也。

△次釋八功德水

疏八德者。唐譯云。一、澄淨。二、清冷。三、甘美。四、輕軟。五、潤澤。六、安和。七、除饑渴。八、長養諸根。

鈔此與觀經疏列少異。彼云。輕清冷爽。美不臭。飲時調適。飲已無患。疏復以八德而對五入。清是色入。不臭香入。輕冷爽是觸入。美是味入。調適無患是法入。妙宗鈔云。疏釋八德。而對五入。并前說法。

卽聲入也。雖成六入。無非妙境。故令行者速證無生。又大本云。八功德水。湛然盈滿。清淨香潔。味如甘露。彼諸菩薩聲聞諸上善人。若七寶池中。澡雪形體。意欲令水沒足。水卽沒足。欲令至膝。水卽至膝。欲令至腰。至腋。以至於頸。水亦如是。欲淋灌其身。悉如其意。欲令其水如初。卽亦如初。調和冷暖。無不順適。開神悅體。滌蕩情慮。清明澄潔。瑩若無形。

△三、釋金沙布地

疏金沙布地者。觀經云。黃金爲渠。渠下皆以雜色

金剛而爲底沙

鈔此經但云金沙布地。觀經云。金剛以爲底沙。其文猶略。具足言之。應如大本云。黃金池者。底白銀沙。水晶池者。底琉璃沙。珊瑚池者。底琥珀沙。有二寶爲一池者。其底沙亦以二寶。若黃金白銀池者。底沙則以珊瑚琥珀。若珊瑚琥珀池者。底沙則以碑礫瑪瑙。若三寶四寶以至七寶。共爲一池。則底沙亦如是。此諸寶池。有方四十里者。有方五十里者。有方六十里者。如是展轉漸大。以至於方二萬四百八十里者。如是大海然。是諸池者。皆菩薩聲聞。諸上

善人生長之所。有時浴於其間。若彼佛池。其方倍此。皆七寶相間而成。白珠。明珠。摩尼珠。爲之底沙。

△四釋四寶

疏琉璃。此云不遠。去波羅奈城不遠。有此寶。故以爲名。玻璃。此云水玉。

鈔琉璃。梵語具云吠琉璃。此云不遠。是故字體。古作流離。以是梵語故。後人見是玉類。故改從琉璃。琉璃亦是梵語。具足應云。宰坡致迦。其狀似此方水晶。有赤白青三色。字體亦應從坡離。人見似玉。

故改從玻璃。碑礎。梵語具足應云。牟婆洛揭拉婆。此云青白色寶。尙書大傳曰。大貝如大車之渠。渠謂車軻。赤珠。佛地論云。赤蟲所出。智論云。眞珠出魚腹中。竹中。蛇腦中。不必唯生蚌胎也。瑪瑙。梵語摩婆羅伽隸。此翻瑪瑙寶。色如馬之腦。故名字體舊作馬腦。後人改從玉石。

△五、釋樓閣

疏樓閣者。觀經云。眾寶國土。一一界上。有五百億寶樓。大本云。其講堂精舍宮殿樓觀。皆七寶莊嚴。自然化成。復以真珠。明月。摩尼。眾寶。以爲交絡。覆

蓋其上

鈔大本又云。阿彌陀佛講堂精舍。皆自然七寶相間而成。復有七寶以爲樓觀欄楯。復有七寶爲之纓絡。懸飾其側。復以白珠。明月珠。摩尼珠爲之交絡。徧覆其上。殊特妙好。清淨光輝。不可勝言。其餘菩薩聲聞。所居宮宇。亦復如是。彼諸天及世人。所居宮宇樓閣。稱其形色高下大小。或以一寶二寶乃至無量眾寶。悉化現而成。

△六、釋四華

疏靈芝云。車輪大小。難爲定準。十住婆沙論云。輪

王千輻輪周圍十五里。青色下觀經云。一一池中。有六十億七寶蓮華。則非止四色。一一蓮華團圓。正等十二由旬。非止如車輪也。大本云。池中蓮華。或一由旬。乃至百千由旬。是知隨機所見。優劣不同耳。

鈔寶池蓮華者。一以爲淨土中之莊嚴。一以爲念佛人之托生。以極樂眾生無有姪欲。故無男女。無有男女。故無父母。無有父母。故無胎生。尙無胎生。豈有卵生。濕生。宜其皆爲化生。第今所談極樂。乃橫出三界。正與娑婆世界平。是以眾生生者。以化

爲主。而三義似兼有之。以其托質蓮胎。而花居水上故也。故大本云。十方無央數世界。諸天人民。以至蜎飛蠕動之類。往生阿彌陀佛刹者。皆於七寶池蓮花中化生。自然長大。亦無乳養之者。皆食自然之食。其容貌形色端正淨好。固非世人可比。亦非天人可比。皆受自然清虛之身。無極之壽。然約下八品言之可也。若上上品生乘金剛臺。到卽見佛。不涉蓮生。而卽悟無生。良有以也。卽解云。隨機所見。優劣不同。亦由乎此。

△二、結成二。初牒科

○次結成

△二釋經二初列經

舍利弗極樂國土成就如是功德莊嚴。

△二釋義二初正釋經文

疏國界嚴飾皆是彌陀積劫熏脩菩提行願之所成就。

鈔釋成如上種種嚴飾皆彌陀功德之所莊嚴。功之言力德之言用此皆如來果上解脫大用以攝受眾生者遠討其因乃始心所發四十八願誓取樂邦嗣後經無量劫修行墳願行滿而後願成願

成而後土淨也。△次指所引文

疏今經文畧若欲詳明當閱大本及與觀經
鈔引文中言大本卽無量壽經二卷廣談淨境言
觀經卽十六觀經廣明行相今經略說世稱小本
卽對大本而言也。

△三、金地天華二初牒科

C三、金地天華

△二、釋經二初列經

又舍利弗。彼佛國土常作天樂。黃金爲地。晝夜六時。
雨天曼陀羅華。其土眾生常以清旦各以衣被盛眾

妙華供養他方十萬億佛。卽以食時還到本國。飯食
經行舍利弗極樂國土。成就如是功德莊嚴。

△二釋義六初釋天樂

疏天樂者觀經云無量諸天作天伎樂又有樂器
懸處虛空如天寶幢不鼓自鳴大本云亦有自然
萬種伎樂又其樂聲無非法音清暢哀亮微妙和
雅一切音聲所不能及。

鈔一切音聲所不能及者大本云如世間帝王有
萬種音樂不如轉輪聖王諸音樂中一音之美百
千萬倍如轉輪聖王萬種音樂不如忉利天王諸

音樂中。一音之美。百千萬倍。如忉利天王萬種音樂。不如第六天王諸音樂中。一音之美。百千萬倍。如第六天王萬種音樂。不如阿彌陀佛刹中諸七寶樹。一音之美。百千萬倍。復有自然種種妙樂。而其音聲無非妙法。清暢嘹亮。微妙和雅。十方世界音聲之中。最爲第一。

△二、釋黃金爲地

疏黃金爲地者。觀經云。琉璃地上以黃金繩雜廁間錯。兼以七寶界其分齊。今言黃金乃地面莊嚴耳。

鈔今經小本從略。若廣明者如大本云。阿彌陀佛刹中皆有自然七寶。所謂黃金。白銀。水晶。琉璃。珊瑚。琥珀。砗磲。其體性溫柔。以是七寶相間爲地。或純以一寶爲地。光色照耀。奇妙清淨。超越十方。一切世界。其國恢廓曠蕩。不可窮盡。地皆平正。無須彌山。及金剛鐵圍。一切諸山。亦無大海小海。及坑坎井谷。亦無幽暗之所。

△三、釋曼陀羅華

疏曼陀羅華。此云白華。亦云適意。然彼國光明常照。不假日月。則無晝夜。準大本經以華開鳥鳴爲

曉蓮合鳥棲爲夜。亦無四時春秋冬夏。不寒不熱常和調適。

鈔白華適意乃四華中略舉其一。具足應如法華天雨四華。一、曼陀羅華。此云白華。二、摩訶曼陀羅華。此云大白華。曼殊沙花。此云小赤花。摩訶曼殊沙華。此云大赤花。大本又云。有天優鉢羅華。鉢頭摩花。拘物頭華。芬陀利花。皆天花也。以彼佛國土主伴依正。皆有光明。故無日月陰陽。寒暑四時。然而以花開鳥鳴爲曉。蓮合鳥棲爲夜。竊恐猶是凡聖同居淨土氣分。與穢土將忘未忘之間。以眾生

生者多帶業往生故若上之三土則無此相也。

△四、釋衣禊

疏 衣禊卽衣襟。

下鈔前九字係疏文

鈔真諦云。外國盛花器也。解存兩釋。初釋爲正。以禊本衣襟。况天花雨時。何必尋器。卽以衣禊而盛之。就襟拾花而散之。散已放襟而忘之。此淨土最適意之事也。

△五、釋供養

疏供養十萬億佛者。大本云。承佛威力。一食之頃。往詣十方無量世界。恭敬供養諸佛。

鈔此猶畧文。若具引者。經云。阿彌陀佛刹中諸菩薩。承佛威神。一食之頃。遍至十方無量世界。供養諸佛。隨心所欲。花香伎樂。衣蓋幢幡。無數供養之具。自然化現在前。珍妙殊特。非世所有。輒以奉佛。及諸菩薩。聲聞之眾。或欲獻華者。卽於空中。化成華蓋。小者周圍四十里。或五十里。或六十里。如是展轉漸大。有至於六百萬里。各隨其小大。停於空中。以成圓像。勢皆下向。以成供養。光色照耀。香氣普熏。不可勝言。旣已用已。隨其前後。以次化沒。諸菩薩復於空中。共奏天樂。以微妙音。歌歎佛德。聽

受經法。喜悅無量。既供養已。忽然輕舉。還至本刹。
猶爲未食之前。

△六、釋食時

疏食時者。午前也。大本云。若欲食時。七寶鉢器。自
然在前。百味飲食。自然盈滿。見色聞香。自然飽足。
身心柔軟。無所味著。食已化去。時至復現。

鈔大本具云。其飯食時。有欲銀鉢者。有欲金鉢者。
有欲琉璃水晶鉢者。有欲珊瑚琥珀碑礫瑪瑙鉢
者。或用明月珠。摩尼珠。白玉紫金等鉢。皆隨其意
化現在前。百味飲食。充滿其中。酸鹹辛淡。各如所

欲多亦不餘少亦不缺亦不以美故過量而食惟以資益氣力食已自然消散而無遺滓或但見色聞香意以爲食自然飽適無所味著身心清利旣已用已自然化去再欲食時復現如前極彼刹中清淨安隱微妙快樂次於無爲泥洹之道。

△四、靈禽說法二。初牒科

○四、靈禽說法二。初正明

△二、釋經四、靈禽說法二。初正明。二、初列經

復次舍利弗彼國常有種種奇妙雜色之鳥白鶴孔雀鸚鵡舍利迦陵頻伽共命之鳥是諸眾鳥晝夜六

時。出和雅音。其音演暢。五根五力。七菩提分。八聖道分。如是等法。其土眾生。聞是音已。皆悉念佛念法。念佛。

△二、釋義六。初、釋奇妙

疏淨土珍禽。與娑婆羽族不同。故云奇妙。如來順世而說。譯人取類而翻。

鈔娑婆羽族。雖有珍禽。旣非光明所化的。係罪業所生。安得稱爲奇妙。或者疑曰。旣非罪業。何以同名。故釋之曰。蓋如來順世而說。故譯人取類而翻。其實不可以此方者比也。

△次別釋眾鳥

疏白鶴等三可解舍利此云春鶯或云鶯鷺迦陵頻伽此云妙音鳥在殼中其音已超眾鳥共命兩首一身報同識異法華云命命是也。

鈔餘如文釋妙音鳥殼字正書應從殼有作殼者非殼音寇大論云頻伽在殼聲逾眾鳥是也頻伽共命此之二鳥東方所無。

△三、釋和雅

疏和雅者音聲悅人演暢者說法無滯。

鈔音聲雖悅人而不惑耳牽心說法既無滯則能

生慧思修。眾生皆不退者。以此。

△四釋道品二初正釋四初五根

疏五根者。一信。二精進。三念。四定。五慧。能生聖道。故名爲根。

鈔三十七品助道之法。譬猶樹焉。始以聞法爲種子。以思修爲種漑。卽四念處。四正勤。四如意足。三者不失其候。因緣成就。則能生五根。根旣得力。則能排厚地之五障。布七覺支之枝葉。以生八正道三昧之華果。始婆娑而作清涼大樹也。故法界次第初門釋云。一信根。謂信於正道及助道法。則能

出生一切無漏禪定解脫。是名信根。二、精進根。謂既信四念處正觀及諸助道善法。倍策精進。勤求不息。是名精進根。三、念根。謂但念正道及諸助道一心觀想。不令邪妄得入。是名念根。四、定根。謂攝心正道及諸助道。一心寂定。相應不散。是名定根。五、慧根。謂四念之慧。爲定法所攝。內性自照。不從他知。是名慧根。

△次釋五力

疏五力同上根名。能排業障。故名爲力。

鈔一、信力。謂信正道及助道法。若信根增長。則能

遮諸煩惱。不爲偏小諸疑所動。故名信力。二、精進力。謂行此正道。及助道法時。若精進根增長。則能破諸懈怠放逸。令一切正助道法成辦。是爲精進力。三、念力。謂念此正道。及助道法時。若念根增長。則能破諸邪想成就。一切出世正念功德。是爲念力。四、定力。謂攝心正道。及助道法。若定根增長。則能破諸亂想。發諸事理禪定。是爲定力。五、慧力。謂四念處之慧。照了一切諸法。若慧根增長。則能除一切邪妄之執。破一切偏小之慧。故名慧力。

△三、七菩提分

疏菩提此云覺分或云支也。一、念覺。二、擇法覺。三、精進覺。四、喜覺。五、輕安覺。六、定覺。七、捨覺。

鈔

一、念覺。念卽思念。謂修諸道法之時。善能覺了。常使定慧均平。若心昏沉之時。當念用擇法。精進喜三覺分。觀察諸法令不昏沉。若心浮動之時。當念用除覺分。除身口之過非。用捨覺分。捨於觀智。用定覺分。入正禪定。攝其散心。令不浮動。是名念覺分。二、擇法覺。擇卽揀擇。謂用智慧觀察諸法之時。善能簡別真偽。而不謬取虛偽之法。故名擇法覺分。三、精進覺。不雜名精。無間名進。謂修諸道法之

時。善能覺了。不行無益苦行。而於諸正法中。常能用心專一。無有間歇。故名精進覺分。四、喜覺。喜卽歡喜。謂心契悟真法。得歡喜時。善能覺了。此喜不從顛倒法生。住真法喜。故名喜覺分。五、輕安。一名除覺分。除卽斷除。謂斷除諸見煩惱之時。善能覺了。除去虛偽之法。增長真正善根。故名除覺分。六、定覺。定卽禪定。謂發禪定之時。善能覺了。諸禪不生煩惱妄想。是名定覺分。七、捨覺。謂離所見念著之境。善能覺了。虛偽不實。永不追憶。故名捨覺分。

△四、八聖道分

正語。四、正業。五、正命。六、正精進。七、正念。八、正定。

鈔謂此八法。不依偏邪而行。故名爲正。復能通至涅槃。故名爲道。一、正見。謂人修無漏道。見四諦分明。破外道有無等種種邪見。是爲正見。二、正思惟。謂人見四諦時。正念思惟。觀察籌量。令觀增長。是謂正思惟。三、正語。謂人以無漏智慧。常攝口業。遠離一切虛妄不實之語。是爲正語。四、正業。謂人以無漏智慧。修攝其心。住於清淨正業。斷除一切邪妄之行。是爲正業。五、正命。謂出家之人。常離五種

邪命利養。常以乞食而活其命。是爲正命。六、正精進。謂人勤修戒定慧之道。一心專精。無有間斷。是名正精進。七、正念。謂人思念戒定慧正道。及五停心助道之法。堪能進至涅槃。是名正念。八、正定。謂人攝諸散亂。身心寂靜。正住眞空之理。決定不移。是名正定。

△二、指闕

疏三十七品。闕四念處。四正勤。四如意足。三科。故云等法。

鈔經旣闢略。解雖不補。今當備出其義。以爲後學

思脩之助。四念處者。念卽能觀之觀處。卽所觀之境也。謂諸眾生。於色受、想、行、識五陰。起四顛倒。於色多起淨倒。於受多起樂倒。於想行多起我倒。於識多起常倒。爲令眾生修此四觀。以除四倒。故名四念處也。一、觀身不淨。身有內外。己身名內身。他人之身名外身。此內外身。皆攬父母遺體而成。從頭至足。一一觀之。純是穢物。眾生顛倒執之爲淨。而生貪著。故令觀身不淨也。二、觀受是苦。領納名受。有內受外受。意根受名內受。五根受名外受。一根有順受違受。不違不順受。于順情之境。則生

樂受。於違情之境。則生苦受。于不違不順之境。則生不苦。不樂受。樂受是壞苦。苦受是苦苦。不苦不樂受是行苦。眾生顛倒。以苦爲樂。故令觀受是苦也。三、觀心無常。心卽第六識也。謂此識心體性流動。若麤若細。若內若外。念念生滅。皆悉無常也。四、觀法無我。法有善法惡法。人皆約法計我。謂我能行善行惡也。善惡法中。本無有我。若善法是我。惡法應無我。若惡法是我。善法應無我。眾生顛倒妄計有我。故令觀法無我也。四正勤者。一、己生惡令永斷。謂五蓋等煩惱覆心。離五種善根。故一心勤。

精進。方便斷除。不令更生也。二、未生惡令不生。謂五蓋等煩惱惡法。今雖未生。後若生時。能遮五種善根。故一心勤精進。方便修習。令永不生也。三、已生善令增長。謂五種善根等善法。雖已生。當守護。令增長。故一心勤精進。方便修習。令不退失也。四、未生善令得生。謂五種善根。雖未生。爲令生。故一心勤精進。方便修習。令得生也。四如意足者。一、欲如意足。欲者希向慕樂莊嚴彼法。故名爲欲。謂凡所修習。一切諸法。若無樂欲之心。事必不遂。若能樂欲。所願皆得。是爲欲如意足。二、念如意足。念者。

專注彼境。一心正住。故名爲念。謂若非一心觀法。斷絕。若能一心所願皆得。是爲念如意足。三、精進如意足。謂唯專觀理。使無間雜。故曰精進。凡所修習。一切諸法。若無精進。事必不成。若能精進。所願皆得。是爲精進如意足。四、思惟如意足。謂於彼境籌量審度。故名思惟。凡所修習。一切諸法。若無思惟。則無所得。悉不成就。若能思惟。所願皆得。是爲思惟如意足。

△五、釋正念

疏孤山曰。念佛如醫王。念法如良醫。念僧如瞻視

人三者既備煩惱之病可瘥。又觀自心寂而常照。則諸法炳然名念佛。照而常寂無法可得。名念法。寂照不二。卽存而亡。名念僧。此一體三寶也。

鈔孤山約二義而釋三寶。一別相。二體。於別相中。又但出應念所以。不云三寶之相。言醫王等者。蓋眾生死之病。根於煩惱。欲治其疾。非佛之大醫王。不能知病而識藥。應病而與藥。故首之以念佛寶。然而雖見之矣。苟不聞法。以求其治方。合而服之。則病不能愈。故次之以念法寶。雖能依法而思修。苟無菩薩良友爲同行。爲外護。爲節飲食。示

其忌諱。而病亦莫能愈。故又次加之以念僧寶。若欲知其所念。則以具足三身四智者爲佛寶所說。十二分教爲法寶。四十一位菩薩爲僧寶。佛滅度後。又有住持三寶。則範金刻木爲佛寶。西來貝葉爲法寶。剃髮染衣爲僧寶。如此二種。若能歸之念之。則煩惱之病本可瘥。生死之病果可痊矣。一一體者。卽文云。又觀自心寂而常照。一云
二云等是也。蓋佛名爲覺。覺卽照也。故以此心寂而常照。諸法炳然者。名佛寶。法名不覺。不覺卽寂。故以照而常寂。無法可得者。名法寶。僧名和合。寂照不二。卽和合。

義故以寂照不二。卽存卽亡者。名僧寶。

△六、釋生心

疏靈芝云。此界心垢常思五欲。彼土心淨專念三寶。兩土升沉於斯可見。

鈔夫對境生心。雖佛聖賢亦不能無。惟求其正焉而已。娑婆世界。塵境麤強。故對境所生之心。住而非正。惟淨土耳中所聞。無非妙聲。故聞是音者。皆悉生深念三寶之心。正所謂生心而無住。無住而生心者也。

△二、釋疑二。初牒科

○二、釋疑

△二、釋經二。初、列經

舍利弗。汝勿謂此鳥實是罪報所生。所以者何。彼佛國土無三惡道。舍利弗。其佛國土尚無惡道之名。何況有實。是諸眾鳥皆是阿彌陀佛欲令法音宣流。變化所作。

△二、釋義二。初、釋淨土惡道有名無體

疏濁世禽畜。罪業所招。淨土何緣有此。故云。勿謂罪報所生。故大本法藏比丘本願云。設我得佛國中有地獄。餓鬼畜生者。不取正覺。

鈔濁世禽畜下。疑問故云下。釋疑故大本下引證。

△次釋淨土惡道名體俱無

疏然彼土清淨。尙無惡道之名字。况有罪報所生之實體乎。皆是彼佛變化所作也。故觀經云。如意珠王湧出金色微妙光明。其光化爲百寶色鳥。和鳴哀雅讚佛法僧。靈芝云。當知眾鳥。卽是如來神力。欲使法音宣暢耳。知非罪報所生也。

鈔然彼下。正明其無。皆是下。明今有所以。故觀經下。引證。靈芝下。引同。

△五風樹樂音二。初牒科

○五風樹樂音

△二釋經二初列經

舍利弗。彼佛國土。微風吹動。諸寶行樹。及寶羅網。出微妙音。譬如百千種樂。同時俱作。聞是音者。自然皆生念佛念法念僧之心。舍利弗。其佛國土。成就如是功德莊嚴。

△二釋義二初引經類明

疏大本云。微風徐動。吹諸寶樹。演出無量妙法音。聲。其聲流布徧諸佛國。聞其音者。得深忍法。觀經又云。其摩尼水。流注華間。演說苦空。無常。無我。諸

波羅蜜。

△次引文明淨

疏孤山云。雖寶樓金池爲悅目之翫。而非惑蕩之色。而能達唯心無境矣。雖風樹鳥聲有入耳之娛。而非忘懲之音。而能念三寶有歸矣。

鈔世人厭煩擾者。必杜視聽于見聞。以墮偏枯之失。樂繁華者。必恣任逸于聲色。以繁紛擾之勞。總之五濁惡世。根塵皆穢。苟無體空之觀。又無析色之門。進之退之。孰能免過。何如淨土。不乏寶樓金池之翫。兼風樹鳥聲之娛。見色而不惑。蕩聞聲而

非忘灑無分別之勞矣。而又能達境惟心深念三寶。無偏枯之失矣。淨土之妙從容中道聞而不求生者。非夫也。

彌陀畧解圓中鈔卷上終

彌陀畧解圓中鈔卷下

明永樂吳郡沙門大佑解

天啟天台沙門傳燈鈔

△二、正報二。初、分科

○二、正報二。初、教主名號二。初、徵名

△二、釋經二。初、教主名號二。初、徵名二。初、列經

舍利弗於汝意云何。彼佛何故號阿彌陀。

△二、解義

疏審其解否。次爲釋通

△二、釋義二。初、分科

○二、釋義二。初、名舍二義二。初、光明無量。

△二、釋經二。初、名舍二義二。初、光明無量二。初、列經

舍利弗。彼佛光明無量。照十方國。無所障礙。是故號爲阿彌陀。

△二、釋義三。初、引大本明光明無量。

疏大本云。阿彌陀佛威德光明最尊第一。諸佛光明所不能及。

鈔此猶畧引。若具引者。阿彌陀佛光明明麗快甚。絕殊無極。勝于日月之明千萬倍。而爲諸佛光明

之王。故號無量壽佛。亦號無量光佛。無邊光佛。無礙光佛。無對光佛。炎王光佛。清淨光佛。歡喜光佛。智慧光佛。不斷光佛。難思光佛。難稱光佛。超日月光佛。其光明所照。無央數天下。幽冥之處。皆常大明。諸天人民。禽獸蜎飛蠕動之類。見此光明。莫不喜悅。而生慈心。其姪沃瞑怒愚癡者。見此光明。莫不遷善。地獄餓鬼畜生。考掠痛苦之處。見此光明。無復苦惱。命終之後。皆得解脫。不獨我今稱讚阿彌陀佛光明。十方無央數佛。菩薩緣覺聲聞之眾。悉皆稱讚。亦復如是。若有眾生。聞此光明。威神功。

德。日夜歸命。稱讚不已。隨其志願。必生其刹。復爲諸菩薩聲聞。所共稱讚。當亦如是。我說阿彌陀佛光明威神。巍巍殊妙。晝夜一劫。尙未能盡。今爲汝等畧言之耳。

△次引觀經光明之用

疏觀經云。徧照十方念佛眾生。攝取不捨。

鈔彼經具云。無量壽佛。有八萬四千相。一一相中。有八萬四千隨形好。一一好中。復有八萬四千光明。一一光明。徧照十方世界念佛眾生。攝取不捨。疏云。若爲佛慈悲所護。終得離苦。永得安樂。釋論。

云。譬如魚子。母若不念子。則爛壞。眾生亦爾。佛若不念。善根則壞。

△三、設問答。釋或者之疑

疏或問。光明無量。我何不見。答。杲日麗天。瞽夫不能覩。是盲者咎。眾生障重。如處覆盆之下。非日光之不普也。

鈔。杲日下。喻佛光本自周徧。瞽夫下。喻眾生無目。不覩。眾生下。合下二句。非日光下。合上一句。蓋佛有三身。光明亦然。若法報身之與光。則無處而不周。無時而不在。應佛身之與光。則隨其機之所在。

而示光現之。然此三佛身之與光。皆須機感而後得見。如觀經云。諸佛如來是法界身。入一切眾生心想中。此言法報二身無所而不遍也。又云。是故汝等心想佛時。是心卽是三十二相。八十種好。是心作佛。是心是佛。諸佛如來正遍知海。從心想生。此則正言三身皆須機感而見。機若熟時。不惟得見于應。亦得見于法身報身也。

△二、壽命無量二初標科

○二、壽命無量

△二、釋經二初列經

又舍利弗。彼佛壽命。及其人民。無量無邊阿僧祇劫。
故名阿彌陀。

△二釋義二初引大本明壽無量

疏阿僧祇。此云無數。大本云。彼佛壽命不可稱計。
假使十方世界眾生皆成聲聞緣覺。竭其智力。於
百千劫。悉共推算。不能窮盡。

鈔大本具云。佛告阿逸多言。汝欲知阿彌陀佛壽
命無極否。阿逸多對言。誠欲聞知。佛言。明聽。悉令
十方無央數世界諸天人民。以至蜎飛蠕動之類。
皆得爲人。又皆作緣覺聲聞。共坐禪一心。合其智

慧爲一智慧。以計數彼佛壽命幾千億萬劫。無有能知者。

△次引大本明本願所致

疏法藏本願云。設我得佛國中人民壽命無能限量。若不爾者。不取正覺。

鈔此大本第十四願文具云。我作佛時。我刹中人壽命皆無央數劫。無有能計知其數者。不得是願終不作佛。

△二、道成十劫二、初、標科

○二、道成十劫

△二、釋經二。初、列經

舍利弗。阿彌陀佛成佛已來於今十劫。

△二、釋義三。初、會通前文

疏前總示云。今現在說法。此示已成佛之劫數也。

△次、會通二經

疏大本云。成佛已來凡歷十劫。唐譯云。經十大劫。皆是一期赴機之說。

△三、會通勝應

疏然勝應身彌互三際。充徧十方。其可以劫數測量其久近耶。

鈔佛之應身。有勝劣兩相。劣則示同凡夫。如釋迦丈六劣應之身。壽八十年。同于灰斷。若如華嚴勝應之身。壽則不可思議。以其卽應卽報故。故華嚴之佛亦稱爲報。乃他受用報身也。彌陀劣應同於人民。以云彼佛壽命及其人民無量無邊阿僧祇劫故。然而雖云無量。旣有觀音稱爲補處。豈非劣應亦有量乎。但是卽劣而勝。非同濁世歸于泥洹。以彌陀機息應轉。觀音機興應起。義當補處故也。

△二、眷屬莊嚴二。初、分科

○二、眷屬莊嚴三。初、弟子無量

△二、釋經三。初弟子無量二。初、列經

又舍利弗。彼佛有無量無邊聲聞弟子。皆阿羅漢。非是算數之所能知。諸菩薩眾。亦復如是。舍利弗。彼佛國土成就如是功德莊嚴。

△二、釋義七。初、釋聲聞眾

疏聞四諦聲教悟道。故名聲聞。

鈔教門有聞聲而悟道者。觀音所修。初於聞中入流亡所是也。此圓頓乘。非小乘比。有聲聞而悟道者。揀異獨覺。觀物變易。自悟無生。今則自不能悟。必假聞佛說四諦聲教。而後知三界苦諦之果。斷

見思集諦之因。慕涅槃滅諦之果。修戒定慧道諦出世之因。以是之故。名曰聲聞。

△次、揀異三果

疏皆阿羅漢者。揀非前三果也。

鈔聲聞者。賢聖之通稱也。故七賢四果皆曰聲聞。經云。皆阿羅漢者。專就果言。故曰揀異三果。

△三、明無緣覺

疏不言緣覺者。攝在聲聞數中。

鈔聲聞緣覺修法雖異。同破見思。同出三界。同證偏真。故可攝在聲聞教中。

△四明無二乘

疏天親論云。二乘種不生。今言回心向大。故得生。以慣習小故。權證二乘。不久證大也。

鈔天親下引論文牒成難辭也。今言回心下引觀經疏。釋其疑惑也。卽天親菩薩所造無量壽經論。有十七成就。至第十六大義門成就中偈云。大乘善根界等無譏嫌名。女人及根缺。二乘種不生。長行釋云。故淨土果報離二種譏嫌過。一者體譏。體有三。一、二乘人。二、女人。三、諸根不具足人。無此三種過。故名離譏嫌也。彼土果報非但無體。三名亦

無故觀經疏設問云。彼往生論。二乘不得生。此經中輩小乘得生。答。正處小乘不生要由垂終發大乘種爾乃得生。經說現生論舉本始。又問。何故復證小果。釋曰。雖復垂終發大心。先多學小。至彼聞苦空無常。發其本解。先證小果。得小果已。於小不住。必還入大。今解文中取意爲答。其義甚明。

△五、菩薩無量

疏而不獨聲聞無量。菩薩亦無量也。

鈔須知彼土正爲攝諸菩薩。欲先增長善根功德者。往生第無機不攝。故不拒凡夫。及與二乘令其

生彼。莫不發廣大心。修圓頓行。登菩薩位。正顯極樂法門。廣大圓滿也。

△六、判教傍正

疏聲聞通兩教二乘。菩薩通四教。正意在圓教。

鈔聲聞通兩教二乘者。藏教析色觀空。通教體色觀空之機也。菩薩通四教者。藏教事六度。通教理六度。別教恆沙法門。圓教無作妙行之機也。此皆約此土求生之人。具四教機。生于彼土。各順本習而爲大爲小。爲偏爲圓。覩四教之佛。聞四教之法。或權證小果。或實證大乘。非久之間。皆入圓位。故

其正意。的在圓教。如萬流歸海。同一鹹味也。

△七、結歸化主

疏然樂邦殊勝。海眾無邊。皆是彌陀願力成就也。
鈔極樂國土。非獨依報莊嚴清淨殊勝。卽眾生生者。大異娑婆。正以此方世界。人雖萬殊。判其品類。大約惟三。曰善。曰惡。曰出世間。惡淪四趣。固不暇言。卽善昇人天。福盡還墮。惟出世間。可以長揖三界。一去不來。第因豎出。登陟良難。蓋塵境麤強。誠爲險處。須彌失足。墮落何疑。總不如極樂法門。橫出三界。平夷坦直。皆可向歸。十方國土。求生者多。

得生彼國。海眾亦廣。所謂夕孕金華。列宿猶慚于
海滴。晨遊玉沼。世燈強喻于河沙。十方爰來。四生
利往。彌陀願力。庸可思議。

△二、生者不退二初標科

○二、生者不退

△二、釋經二初列經

又舍利弗。極樂國土。眾生生者。皆是阿鞞跋致。

△二、釋義二初釋不退

疏阿鞞跋致。此云不退轉。下文云。皆得不退轉於
阿耨多羅三藐三菩提。則知生彼國者。雖下品凡

夫直至成佛更無退墮。

鈔若約教明。不退轉位有三。謂位行念也。今云不退轉者。無論入此三位。卽博地凡夫。生彼國者。雖未斷惑。亦不退轉。如十疑論云。彼國五因緣。故不退。一、彌陀願力攝持。二、佛光常照。三、水鳥樹林。常演說法。四、純諸菩薩爲友。五、壽命永劫。

△次引證大本

疏大本云。其有眾生。生彼國者。皆悉具足三十二相。諸根明利。乃至成佛。不受惡趣。神通自在。常識宿命。於此世界。有六十七億不退菩薩。往生彼國。

鈔所引大本文有兩段。初是一生補處分中節文。次是菩薩往生分中節文。須者往閱。

△三、補處甚多二。初、標科

○三、補處甚多

△二、釋經二。初、列經

其中多有一生補處。其數甚多。非是算數所能知之。但可以無量無邊阿僧祇說。

△二、釋義三。初、通釋其位

疏一生補處。卽等覺也。亦名最後身。謂次當作佛。惟餘一生。

鈔等覺者與果佛妙覺將等。猶此方之亞聖也。最
後身者煩惱究竟。生分已盡。惟此一生在。更不受
變易。後有也。故曰次當作佛。惟餘一生。

△次的指其人

疏若此土彌勒是也。彼土則觀音次補佛處。勢至
又補觀音處。

鈔此土彌勒補釋迦處。至於成佛。仍號彌勒。若觀
音次補彌陀之處。則改號普光功德山王如來。勢
至次補觀音之處。則改號善住功德寶王如來。或
問曰。彌勒補處。今居兜率。觀音補處。亦居內院否。

對曰。此方穢土。故凡補處。先居兜率。將成佛時。要當下生。示爲凡夫。脩而後得。彼邦淨土。但如天王世子。位居儲君。以待彌陀應謝。卽登佛位。何須現迹。示居天宮。

△三、引大本證

疏大本云。彼國菩薩。皆得究竟一生補處。除其本願爲眾生故。以弘誓鎧。而自莊嚴。其數甚多。不可稱計。故云阿僧祇也。

鈔大本具云。諸往生者。皆具足三十二相。究竟深入妙法要義。諸根明利。其初鈍根者。成就二忍。利

根者得不可計無生法忍。皆當一生遂補佛處。所以者何。彼佛刹中。皆住於正定之聚。無諸邪聚。及不定之聚。復無三種過失。一者心無虛妄。二者位無退轉。三者善無唐捐。所以生於彼者。有進無退。直至成佛。惟有宿願。速度眾生。則以弘誓功德。而自莊嚴。入他方生死界中。作師子吼。說法度脫。爾時阿彌陀佛。以威神力。令彼教化。一切眾生。皆發信心。乃至成佛。於其中間。不受惡趣。神通自在。常識宿命。雖生五濁惡世。形迹與同。其清淨快樂。無異本刹。

△二修證行法二初分科

○二修證行法四初信願二初發願求生

△二釋經四初信願二初發願求生二初列經
舍利弗眾生聞者應當發願願生彼國

△二釋義二初釋相

疏願能導行如牛挽車要須御者則能有所至淨
佛國土由願引成

鈔願能導行法也如牛挽車喻也牛車喻行御者
喻願淨佛國土下合也御車達到卽是寶所淨佛
國土卽其事也淨土有因其引因者莫先乎願故

願爲行首。

△次引證二。初引天親

疏天親論云。菩薩所修善根。不爲自身。欲拔一切衆生苦故。攝取衆生同生彼國。

鈔引天親論者。明淨土之願。雖曰願生彼國。其實不爲自求。欲學佛慈悲。拔苦與樂。論云。欲拔生苦。卽悲以拔苦。攝生彼國。卽慈以與樂。是則今願應該四弘。

△次引四明

疏四明云。但爲戒福不精。無往生願。故在穢土。聞

法入真。須懼娑婆不常值佛。塵境麤強。誠爲險處。致多退失。故須外加事懺。內勤理觀。加願要制。必於寶刹。速證無生。

鈔引妙宗鈔文。雖專在自利。而意亦利人。文兼行願。同前。如牛拽車。要在御者。然其行中。又須正助。兼行。故曰外加事懺。內勤理觀。必於寶刹。速證無生。

△二、聖賢聚會二。初牒科

○一、聖賢聚會

△二、釋經二。初列經

所以者何。得與如是諸上善人俱會一處。

△二釋義二。初釋諸上善人二。初泛指三品。

疏諸上善人者。指前聲聞菩薩一生補處也。

鈔諸上善人大畧三品。一聲聞眾。二諸位菩薩。三等覺菩薩。

△次的指勝者

疏慈覺云。娑婆國土觀音勢至徒仰嘉名極樂世界。彼二上人親爲勝友。如染香人身有香氣。

鈔娑婆下言此土勝友難逢。此指正像末法可也。若如來在世。西印土人亦與恆會極樂下言彼方。

菩薩易見。不特易見。且親爲勝友。如染香下舉經
喻之。如染香人。身雖非香。以染香故。而身有香氣。
喻生淨土者。雖未入位。以念佛故。而菩薩與居。

△二、釋俱會一處

疏以不退菩提。故同佛所證。謂同法性身。同常寂
光土。故云俱會一處。

鈔一處者。非徒曰與諸上善人。俱會事相之一處。
蓋俱會所證理性之一處也。卽能居之法性身。所
居之寂光土。方名真一處也。

△二、修行二。初、分科

○二、修行二。初、反顯餘善不生。

△二、釋經二。初、反顯餘善不生二。初、列經。
舍利弗、不可以少善根。福德因緣得生彼國。

△二、釋義四。初、釋少善根。

疏靈芝云。欲顯持名功勝。先斥餘福爲少善根。施戒禪誦。一切福業。若無正信回向願求。皆爲少善非往生因。

鈔解中有簡有收。簡之則若無信願回向。皆爲少善根福德因緣。非往生之正因。收之則若有信願回向。皆爲多善根福德因緣。是往生之助行。

△次釋多善根。

疏若依此經執持名號發願往生方名多善根也。
鈔此經往生正因的在一心持名發願回向如是
善根其功也多其根也深決得往生永爲佛種。

△三、明正與助

疏善根明正行謂執持名號一心不亂福德約助
行。

鈔佛之大道非正無以爲行門非助無以爲資糧
更加發願要制方能速證無生。

△四、引證助行

疏觀經云。欲生彼國者。當修三福。一者。孝養父母。奉事師長。慈心不殺。修十善業。二者。受持三歸。具足眾戒。不犯威儀。三者。發菩提心。深信因果。讀誦大乘。勸進行者。如此三事。名爲淨業。皆往生之助行也。

鈔觀經疏云。第一、孝養父母。奉事師長。敬上接下。慈心行也。修十善業。是其止行。身除三邪。口離四過。意斷三惡也。妙宗鈔云。此經正被頓修之機。雖修佛行。父母師長。豈不孝事。輪王十善。豈不止行。但能修之心。一一稱性。何妨所修慈孝之善。共於

凡夫觀經疏云。第二三歸者。佛法僧在家戒亦卽是十戒。具足眾戒者。道俗備受。微細不犯。威儀者三千悉皆不缺也。妙宗鈔云。圓頓行者。豈違小乘出家之式。三歸眾戒威儀等事。但受持之心。合於一體。依於畢竟。而所行之法。共於二乘。觀經疏云。第三發菩提心。是願起意趨向。名爲發心。菩提是道。佛果圓通。說爲菩提。讀誦大乘。明修解也。行能運通。說之爲乘。餘二不及。是言大也。妙宗鈔云。依無作境。起無緣誓。名發菩提心。實相不二。而二立因果殊。二而不二。始終理一。信此因果。方名爲深。

讀誦大乘。修三智解。運圓乘行。以此解行。教其行者。名爲勸進。此三種業。得前前者。不得後後。得後後者。必得前前。故今行人。能修前二。前二不能修於大乘。故云餘二不及。是言大乘。皆往生之助行也。

△二、正示持名方法二。初牒科

○一、正示持名方法

△二、釋經二。初列經

舍利弗。若有善男子。善女人。聞說阿彌陀佛。執持名號。若一日。若二日。若三日。若四日。若五日。若六日。若

七日一心不亂。

△二釋義五初釋執持之義

疏孤山曰執謂執受持謂任持信力故執受在心念力故任持不忘。

鈔執持者執而後持亦名受持故解曰執謂執受然則聞而不信不足以爲執受又曰持謂任持如人有力堪任持物是則信而不念不足以爲任持故曰信力故執受在心念力故任持不忘。

△次釋若字之義

疏若者不定之辭利根一日一念鈍根或至七七

日行成。縱未破惑。定爲往生之因。

鈔經文既云若矣。又增數至於七日。是則往生之因。要在持名。階於一心不亂。而人根利鈍。日數限乎七等。若利根者。一日成乎一念。鈍根至於七日。而解中又增云七七者。此或約極鈍根者爲言。或約行門逾增勝者而說。然則持名一心不亂者。因也。得一念者。約行成而爲言也。縱未破惑。定爲往生之因者。此言一念之力。有伏惑之功也。蓋言若能伏惑。臨終正念自然現前。往生淨土必矣。

△三釋一心不亂二初總標

疏一心不亂。有事有理。

△二、分釋二。初事一心

疏事一心者。行者繫緣憶念阿彌陀佛。相好光明。無分散意。念念無間。名事一心。

鈔繫緣憶念者。觀也。阿彌陀佛等境也。無分散意。念念無間者。念力勇猛。能排雜念。使內心不起。外境無侵也。下文雖明理中一心。要須先假持事中一心。以爲其本。理中不過用解力而融之通之。使無滯事相。以爲殊勝之因。苟微乎此。曷能成就一念伏惑之功耶。

△次釋理一心二初明一心三觀

疏理一心者。了達能念之心。所念之佛。皆無自性。雖本來空寂。而感應道交。如鏡像水月。任運顯益。當處皆空。全體卽假。一邊叵得。中道不存。三諦圓融。絕思絕議。名理一心。

鈔了達下明卽空義。言能念所念。皆無自性者。此約四性而體達無生也。應云亦無他性。其性無因性。文之畧也。此中宜以能念之心本空。爲無自性。所念彌陀本空。爲無他性。感應道交。如鏡像水月。爲無共性。任運顯益。爲無無因性。此乃攝後歸前。

以明無有四性也。次雖本來空寂下。明卽假也。上二句約法明假。下二句約喻明假。乃以形之與水喻感。鏡之與月。喻應。鏡月本無心。而自然現乎影像。形水亦無意。而法爾感乎鏡月。功至往生。任運顯益也。當處皆空者。有卽空也。全體卽假者。空卽有也。有卽空。則有卽非有。空卽有。則空卽非空。非空非有。則中道昭然。卽空卽有。則中道亦亡。故曰。二邊叵得。中道不存。如是則所觀之境。三諦圓融。能觀之心。絕思絕議。事理二門。已如解中畧示。若欲更明其旨。則又有橫豎二種不同。橫論三觀。則

能念屬乎三觀。所念屬乎三諦。如正稱名時。了能稱心。非內非外。無形無狀。卽空觀。雖非內外形狀。而此能念之心。歷歷分明。卽假觀。而此能念。非離假而有空。亦非離空而有假。雙遮雙照。卽中觀。所稱佛名。及以音聲。如谷中響。如水中月。了不可得。卽真諦。雖不可得。而佛號音聲。宛然在口。顯然在耳。卽俗諦。而此所念。亦非離真而有俗。亦非離俗而有真。俱存俱忘。卽中諦。此橫論三觀三諦也。若豎論者。祇以一心不亂。萬緣俱寂者。爲空觀。以所念六字聖號。朗朗分明者。爲假觀。能念雖空。而念

者宛然。所念雖假。而谷響不實。如是則卽空不空。而空卽假。卽假非假。而假卽空。雙遮雙照。境觀雙忘。所謂境爲妙。假觀爲空。境觀雙忘。卽是中忘。照何嘗有先後。一心融絕了無蹤。若然者。求生淨土之人。但以一心不亂。而執持名號。祇執持名號。而一心不亂。無邊妙義。咸在其中。不思議觀。非離當體。可謂全性起修。全修在性也。又須了知經中之意。一心不亂。欲使因果名目相應也。執持名號。欲使生佛感應道交也。因果名目相應者。極樂稱爲淨土。惟其心淨。而後佛土淨。但心淨土淨。其義甚

通圓伏五住。圓破三惑。皆名心淨。而此心淨。感佛土淨。則圓該四土。今是同居淨土。只須一日。至於七日。執持名號。一心不亂。以爲心淨往生之因。二生佛感應道交者。彌陀妙應。旣是果人。復有宿誓。令我持名。是故必須執持名號。以爲心淨往生之因。故一心不亂。與執持名號。二義相須。闕一不可。故此經宗須以四句料簡。一是一心非持名。卽尋常修禪。與夫一心修諸眾行。又無回向發願。悉非往生正因。二是持名非一心。卽散心持名。雖是佛乘緣種。亦非往生正因。三、非一心非持名。卽悠悠

△不

凡夫作諸善事亦非往生之因。四是一心是持名。
方是此經所說往生正因。若約此經說在方等收
四教機以判一心則有四種行人一△同。一藏教人。
心佛實有。惟約事相制心不亂。以此爲因。加之信
願。臨終果熟。卽得往生。今之凡夫。未通至理。惟關
閉六情。不出不入。而一心持名。或用心推究。種種
剖析。皆藏教人。一心持名也。二通教人。善能了達
若心若佛。如幻如化。佛本是無。心亦何有。聲如谷
響。佛如鏡像。如此體解。當處無生。此通教人。一心
持名也。三別教人。先能達空。亦能達假。以我空心。

而造假佛。非惟佛有。不妨心有。然以空心而念假佛。空既不空。假亦不假。非假非空。見於中道。此別教人一心持名也。四圓教人能達淨土唯心彌陀本性。卽真俗中觀中空假。有念無念。無非法性。無佛有佛。皆是真如。終日有念。終日無念。以無念念。念有相佛。無生而生。生而無生。此圓教人一心持名也。此約方等時義釋。如是若約法華開權顯實者。應會前教。悉歸圓頓。以藏教人關閉六情制心不亂。爲我圓教事中一心通教如幻。爲我圓教卽空一心。別教出俗。爲我圓教。卽假一心。圓本相卽。

不須和會。以法華妙。具二妙故。前圓教一心爲法華相待論妙。今統會歸爲法華絕待論妙。是故圓家行人已聞妙法。深悟圓理。以起圓宗。如此力用圓融無礙。了事乃卽理之事。理乃卽事之理。是以一心持名時。事一心可也。理一心可也。事理相卽一心可也。念念無非法界。心心皆卽真常。如是念佛功德最大。能伏五住煩惱。能破一心三惑。能淨四種淨土。能見三身彌陀。是爲不思議念。是爲無功用念。永明所謂有禪有淨土。猶如戴角虎。今世爲人師來生作佛祖。此偈正爲圓頓人。一心持名。

者說也。

△次明性具宗旨

疏須了達法界唯心。心外無境。彌陀相好。元是自心。十萬億刹。不踰當念。以性具諸法故。不從他得。
鈔法界有三義。一性具。卽三千世界也。一性體。卽清淨本然。一真如法界也。一曰性量。卽一真法界。豎窮橫遍之界量也。三種法界之性。皆惟眾生根塵相對。一念分別識心。是故離心無境。離境無心。以是之故。彌陀相好。乃我本性之彌陀。十萬億刹。乃吾唯心之淨土。故曰元是自心。不踰當念。是故

結云。以性具故。不從他得。

△四、釋本經稱名

疏。又復當知。彌陀已證究竟第一義諦。一稱嘉號。萬德齊彰。罪銷塵劫。福等虛空。何況一日至七日耶。良由法藏本願。設我得佛。十方眾生。至心信樂。欲生我國。乃至十念。若不生者。不取正覺。既承彼佛因中願力。果上光明。執持名號。功德無量。臨終見佛。決定無疑。

鈔。前釋事中一念。乃約憶念彼佛相好光明而說。似濫觀。經觀佛爲念。用心雖同。揀境則異。今則的

指執持名號。而爲所緣之境。故曰一稱嘉號。萬德齊彰。文中乃釋或者之伏疑。疑者云。佛有萬德。應觀三身。云何但稱名號。卽得往生。故殷勤示之曰。又復當知等云云。文約兩義。以釋其疑。一者名實相稱。二者法藏本願。一名實相稱者。四明云。圓極之果。所有名字。一一不虛。究竟成就。蓋其所召。皆真極故。故大經云。世諦但有名。無實義。第一義諦有名。有實義。佛是究竟第一義諦故。又今彌陀既已證乎究竟第一義諦。故一稱嘉號。萬德齊彰。彌陀萬德慧日。既以俱體齊彰。眾生黑暗罪瑕。自然

當念消乎塵劫。罪性本空。虛而不實者。既銷。則稱名功德福等虛空者。自生。一稱佛名。功德尙然。況一日至七日。一心不亂。執持名號。則無罪而不滅。無福而不生。臨命終時。往生淨土。斷斷乎不唐捐矣。良由下第二示法藏本願云云。蓋諸佛本願。毫無虛假。以彌陀因中發四十八願已。卽便經歷曠劫。修行以填願海。願海旣滿。無量法財。一時發現。是故今取極樂世界。攝受有情。而娑婆眾生。已信是事。仍發往生之願。以投願海。復修稱名之行。以增行山。萬流歸海。同一鹹味。須彌攝物。其一帝青。

自然而然。原非勉强。是故解文末後。合二義以結斷。疑根云。既承彼佛因中願力。果上光明。執持名號。功德無量。臨終見佛。決定無疑。

△五、訂此經訛脫三。初、出古本

疏靈芝疏載襄陽石本。於一心不亂下。有云專持名號。以稱名故。諸罪銷滅。即是多善根福德因緣。

△次、訂訛脫

疏彼石經本。六朝人書。竊疑今本相傳訛脫。

鈔解中既云。今傳訛脫。凡讀習者。應依古本而增正之。

△三、況顯持名

疏況我彌陀。以名接物。耳聞口誦。無邊聖德。攬入識心。永爲佛種。頓除億劫重罪。獲證無上菩提。信知非少善根。實謂多功德也。

鈔凡諸佛應身接物。有乎四益。一、以形益。現身是也。二、以光益。放光是也。三、以聲益。說法是也。四、以通益。現神足是也。惟阿彌陀四益之外。更加之以名接物。以其有本時所發誓願故也。餘之四接。其攝機也狹。惟以名接物。其攝機也廣。旣彌陀以名而接物。故眾生得以耳聞而口誦。豈惟一稱嘉號。

而萬德齊彰。且又無邊聖德。攬入識心。永爲佛種。
除罪證道不可思議。其善根功德。豈小小哉。竊原
淨土法門。其所開示一也。惟所修之方。厥門雖多。
要其所歸。不出二種。一曰正修。二曰助行。於正修
中。其法有二。一觀想。二持名。專心作觀。則文載觀
經。專心持名。則文載此經。若觀想與持名。兩者並
行。則文載般舟三昧經。今欲明其義。則有五種不
同。一、名實不同。名卽佛界假名。實則佛界五陰。與
夫國土。觀五陰實法。則觀經所示佛菩薩三輩往
生等九觀。觀依報國土。則觀經所示日水地樹等。

六觀。若般舟經所示。但觀佛身正報實法而已。今經所示。但持假名。故曰聞說阿彌陀佛執持名號。是則依此經修。但以稱佛名號。六字音聲。而爲所緣之境。無以觀佛相好。以濫經宗。所謂一稱嘉號。萬德齊彰。舉假名而全收實法。故知此經所示。乃提綱挈領之法門也。二緩急不同。如觀經所示。十六妙觀。始修日觀。必待成就。然後改觀。觀水觀冰等。緩緩而進。辦在一生。此經所示。持名方法。極其長期。在於七日。其次或六或五乃至一日執持名號。一心不亂。并觀經下輩往生。大彌陀經臨終十

念。節得往生。故知此經所示。乃以急勝緩之法門也。三難易不同。觀經修觀。以凡夫之人。心想羸劣。故先示日觀。西向以攝其心。待心靜細。然後觀水觀冰。乃至像觀成就。然後觀佛真身。此必久修成熟之機。乃可行之。今經所示。初心凡夫。但是有口能稱。有心能念。皆可修之。故知此經所示。乃至簡至易之法門也。四、純間不同。十六觀門。初心修者。跏趺入定。然後可觀。出定厯緣。非其境界。若執持名號。不間閒忙。不拘動靜。行住坐臥。皆可修之。故知此經所示。乃至捷至徑之法門也。五、攝機不同。

若依觀經所修。惟被上根。故所修之機狹而不廣。稱名之法。不擇賢愚。不揀男女。若貧若富。若貴若賤。皆可修之。故知此經所示。乃攝機極廣之法門也。是則此經所明境觀。只須惟約執持名號。爲所觀境。若事若理。悉以此而解說修行。不必更約觀佛相好。而雜附之。

△三、感果二。初、分科

○三、感果二。初、感聖迎接

△二、釋經二。初、感聖迎接二。初、列經

其人臨命終時。阿彌陀佛。與諸聖眾。現在其前。

△二、釋義二。初、隨品所感。

疏靈芝云。聖眾現前亦有多種。或真佛化佛。觀音勢至。隨其品位委在觀經。

鈔真佛者彌陀之應身也。此有二種。一勝應。二劣應。化身則從應身又變化其身而來接引。準例觀音勢至亦有真之與化。隨其此方念佛功行破惑伏惑。以感何身而接引之。

△次、破斥謬解三。初、序謬。

疏或謂臨終見佛以爲魔者。或云自心業現實無他佛來者。

鈔世間禪門淺悟。教苑謬承。多作此說。

△二、斥過

疏斯蓋不知生佛一體。感應道交。自障障他。爲過非淺。

鈔凡是見佛。須論感應。若平居參禪。或修空觀。既宗掃蕩。佛亦不立。苟有所見。悉爲魔境。或功用顯著。心佛自現。亦須觀空。弗生著相。今既念佛求生極樂。臨終見佛。此因妙感。復由生佛本是一體。感應道交。法爾如是。若不明此妄論邪談。不惟自障。兼亦障人。於此法門。大成罪過。

△三、引證

疏法藏本願云。眾生發願欲生我國。臨命終時。假令不與大眾圍繞。現其人前者。不取正覺。

鈔彌陀夙昔既有弘願。眾生又能依願求生。此正生佛天性相關。感應道交。不可思議。

△二、正念往生二。初牒科

○一、正念往生

△二、釋經二。初列經

是人終時。心不顛倒。卽得往生阿彌陀佛極樂國土。

△二、釋義二。初明佛力攝持

疏乘彌陀願力攝持。不爲平昔妄想攀緣。傾動其心。正念現前。故云心不顛倒。

鈔娑婆眾生。雖能念佛。浩浩見思。實未伏斷。而能垂終心不顛倒者。原非自力而能主持。乃全仗彌陀。乘大願船。而來拔濟。雖非正念。而能正念。故得心不顛倒。卽得往生。

△次明白他兼濟

疏因前念佛罪滅障除。淨業內熏慈光外攝。離苦得樂。一剎那間。故云卽得往生等。

鈔經云。至心念佛一聲。能滅八十億劫生死重罪。

夫生死未來所受之報障也。重罪。往昔所造之業障也。業從心造。過去世時之煩惱障也。八十億劫言過去所起煩惱所造惡業極長之時分也。如是長時三障。一稱佛名。而能頓滅者。此由行人念佛智慧之日。合佛慈悲智慧之日。二慧日光。重重相照。故無煩惱之暗而不燭。無罪業之幽而不照。亦無生死之縛而不解。離苦得樂。卽得往生。豈虛謬哉。是則雖由慈光外攝。而又全憑念力至心。寄語行者。尋常稱名。七日之期。而功始一日。一日之期。而功始一時。一時之期。而功始一念。果能一念至

心而滅除眾罪。則一時二時之功。當何如哉。一日七日之功。又何如哉。成山之功。始於初簣。求生淨土者。尙勉之哉。故普智大師引涅槃經云。譬如少火。能然一切草木。如少金剛。能壞須彌山。所以觀經下品中說。火車相現。尙得往生。皆由慚愧之心。信力堅固。方能滅惡。若觀世人。爲善心輕。爲惡心重。誠恐善未敵惡。何以得生淨土。請以現事驗之。對佛像。則不如接大賓之恭謹。學經法。則不如求財利之勤劬。毀他。則氣麤語滑。讚彼。則氣緩語澁。或以惡之。則覆善揚惡。好之。則掩短美長。凡此用

心方沉惡趣。欲以少善消多惡而求生者。難矣哉。

△四、結勸二。初牒科

○四、結勸

△二、釋經二。初列經

舍利弗。我見是利。故說此言。若有眾生聞是說者。應當發願。生彼國土。

△二、釋義

疏淨業功勳。願爲最要。是故如來再三勸勉。

鈔淨業之宗。雖具三要。願爲船舵。又居其先。信行有所要制。直捷往生無疑。

△三、諸佛稱讚二。初牒科

○三、諸佛稱讚三。初釋迦稱讚

△二、釋經三。初釋迦稱讚二。初列經

舍利弗。如我今者讚歎阿彌陀佛不可思議功德之利。

△二、釋義三。初釋稱讚所指

疏牒前稱讚依正莊嚴願行功德利益無量。以例六方諸佛悉亦如是稱讚。勉令生信。

鈔前所稱讚依正莊嚴指所詮之體也。願之與行指所詮之宗也。功之與德指所詮之力用也。如是

利益無量無邊。尚不可以心思。況可以言議。金口叮囑。勉令生信。讀是經者。可不修之。

△次、明秦譯之簡

疏唐譯具有十方。此惟六方。畧去四維耳。

鈔歷代譯經。惟什師順此方之機。而十一畧之。無論其他。卽此經十方佛讚。而畧去其四。人皆傳誦似有不期然而使之然者。亦可謂得契理契機之妙也。

△三、指科判之失

疏孤山疏。此後卽屬流通。今謂諸佛稱讚是本經

題一經要旨。合歸正說

鈔孤山判屬流通者。意謂六方佛讚是使流通故也。不知此讚是本經題目。豈有經義屬於正宗。而經題又屬流通耶。

△二、諸佛同讚二。初牒科

○二、諸佛同讚六。初、東方二。初、現相表彰

△二、釋經六。初、東方二。初、現相表彰二。初、列經

東方亦有阿閦佛。須彌相佛。大須彌佛。須彌光佛。妙音佛。如是等恆河沙數諸佛。各於其國出廣長舌。相遍覆三千大千世界。

△二、釋義四。初、釋佛名五。初、釋阿閦軀佛。

疏 阿閦軀佛。此云不動。法身常住無遷變故。

鈔 論佛三身悉無遷變。以報身契法證一性故應身從體起用全用在體故。今但云法身者。以讓此身非修成故也。

△次、釋須彌相佛

疏 須彌此云妙高。佛相如之妙則三德圓融。高則迥出因位。

鈔 三德圓融。簡異偏證。迥出因位。簡異分真。乃圓頓妙覺果佛。若曰佛相如之。乃所現勝應。被高山

王機說華嚴等經之佛。亦可名爲報身。

△三、釋大須彌佛

疏大須彌者。佛德高大。如須彌盧。超過眾山。

鈔高則位躋究竟。廣則德備法界。超過因位。稱大須彌。

△四、釋須彌光佛

疏須彌光者。光如須彌映蔽眾山。

鈔報智光明。豎高橫遍。因位偏乘。悉皆映蔽。

△五、釋妙音佛

疏妙音者。音聲美妙。說法稱機。

鈔音聲雖美。不能說法。固非妙也。雖能說法。若不稱機。亦非妙也。

△次釋恆河沙

疏恆河亦云宛伽河。在天竺無熱池側。廣四十里。其沙至細。與水同流。言其多也。

鈔無熱池。卽梵語阿耨達也。有四口。從東南角白象口所出之水。流入恆河。沙細如麵。佛常於此河之側說法。凡指數多。必以此河之沙爲喻。令易曉故。

△三、釋廣長舌相

疏出廣長舌。表無虛妄。無量劫來。口離四過。故感此相。

鈔凡人之舌。隨其報相。各有廣長。若此方貴人。舌

舐至鼻。然能可長可短。則以之爲貴。苟長而不能縮。短而不能伸。此必生前好演是非。爲短長之說。故感今生如此之報。以驗世人不妄語者。必得其所。惟佛世尊多劫實語。故舌相廣長。超異常人。然有常相。現相不同。若常相者。縮之雖常在口。伸之則能覆面上至髮際。此曾令外道生信。所示如此也。若夫現相。又有大小不同。畧舉二經。法華言高。

而不言廣。故曰上至梵世。此經言廣而不言高。故曰遍覆三千大千世界。要知二經大小相齊。但文互畧。故各舉一邊。悉是表無虛妄。現此以敦聞者之信耳。又義法華明豎出三界。故但言高。此經明橫出三界。故但言廣。若卽豎而橫。卽橫而豎。文雖互畧。義必相齊。

△四、釋三千大千

疏三千大千世界。俱舍頌云。四大洲日月。須彌盧欲天。梵世各一千。名一小千界。此小千千倍。說名爲中千。此千倍大千。皆同一成壞。謂萬億四天下。

總爲一佛土也。

鈔前文已釋須者往尋。

△二、發言勸信二。初牒科

○二、發言勸信

△二、釋經二。初列經

說誠實言。汝等眾生當信是稱讚不可思議功德。一切諸佛所護念經。

△二、釋義二。初釋令生深信

疏決定不虛故言誠實。十方世界。恆沙諸佛。異口

同音說此法門。令生深信。

鈔十方諸佛說誠實言者謂淨土法門。非但我釋迦如來於此經中以決定不虛之言而爲大眾宣說。卽十方諸佛亦異口同音說如是決定可信誠實之法也。此段經義。昔慈恩法師謂觀此經勢。蓋他方諸佛告自國聽眾。釋迦轉引彼佛意言。證彼西方。令此會眾生信敬也。而靈芝法師所說。又自不同。謂正當釋迦說此經時。十方諸佛同時勸讚。令信是經。余謂準前。旣云亦有要當以慈恩爲正也。

△次釋是本經題。

疏稱讚下十六字。是本經題。上八字。言極樂依正莊嚴。行願因果。下八字。言六方稱讚。下文釋云。聞是經受持者。及聞諸佛名者。皆爲諸佛護念。不退菩提。

鈔準慈恩師意。則下八字。總是釋迦與諸佛。皆說淨土法門。而此唯心淨土。本性彌陀之旨。皆爲諸佛之所護念。越溪澄師云。此經有四不可思議。一者依報。雖是同居。而體是寂光。二者正報。雖是應身。卽法卽報。三者修因。四者感果。七日持名。卽感聖果。因果不二。皆是不可思議功德。

△二、南方二。初牒科

○二、南方二。初現相表彰

△二、釋經二。初現相表彰二。初列經

舍利弗。南方世界。有日月燈佛。名聞光佛。大燄肩佛。
須彌燈佛。無量精進佛。如是等恆河沙數諸佛。各於
其國出廣長舌相。遍覆三千大千世界。

△二、釋義五。初釋日月燈佛

疏 日月燈光表佛三智

鈔 三智之中。一切種智。最爲尊勝。取喻如日。無幽

不燭。而寰宇居尊。道種智。出假利物導利羣萌。取

喻如月。長養萬物。各得華茂。一切智。破見思惑。於空得證。取喻如燈。能除室暗。使獲智明。

△次釋名聞光佛

疏名聞光者。名聞十方。如光徧照。

鈔三德智光遍照十方。有名稱之實。故有名稱之聞。

△三釋大燄肩佛

疏大燄肩者。肩表二智。燄喻照理。

鈔左肩表實智。右肩表權智。二智之燄。能照權實之理。喻如燄肩。

△四、釋須彌燈佛

疏須彌燈者。須彌高出眾山。燈表化他之用。
鈔高出眾山。表自證之體。備乎四德。高出因位。化
他之用。卽用卽體。利無不妙。

△五、釋無量精進佛

疏無量精進者。方便度生。未嘗休息。眾生無量。悲
智亦然。

鈔眾生無量。言數多也。未嘗休息。言時長也。如來
之悲智方便。度盡眾生。不雜不退。故名無量精進。

△二、發言勸信二。初牒科

○二、發言勸信

△二、列經

說誠實言。汝等眾生當信是稱讚不可思議功德。一切諸佛所護念經。

△三、西方二。初牒科

○三、西方二。初現相表彰。

△二、釋經二。初現相表彰二。初列經。

舍利弗。西方世界有無量壽佛。無量相佛。無量幢佛。大光佛。大明佛。寶相佛。淨光佛。如是等恆河沙數諸佛。各於其國出廣長舌相。遍覆三千大千世界。

△二、釋義七。初、釋無量壽佛。

疏無量壽佛者。靈芝云。同名甚多。決非法藏所成之彌陀也。慈恩云。設若彌陀自讚。於理何妨。謂稱讚此法門。令生深信。非自伐其善也。

鈔靈芝謂決非極樂彌陀者。以其十方諸佛各於本國稱讚。說此彌陀一經。令眾生聞者生信受持。發往生願。若彌陀自讚者。豈令極樂眾生又求生別有極樂淨土乎。況自伐其善者。祇可譏乎下凡。若如來者自稱我是如來應供等。勉令聞者咸來聽法。成乎三慧。豈自伐之言乎。

△次釋無量相佛

疏無量相者。相好無量也。

鈔相好無量者。如盧舍那。真足十華藏海微塵相好。阿彌陀佛。真足八萬四千相好光明。龍女之讚釋迦。微妙淨法身。真相三十二。以八十種好用莊嚴法身。皆可名爲相好無量也。

△三、釋無量幢佛

疏無量幢者。功德無量。超勝如幢也。

鈔幢有二義。一高出。有超勝義。二八方。有摧邪義。今取高出。故釋云超勝。

△四、釋大光佛

疏 大光者。廣大光明。暎蔽一切也。

鈔 智慧光明。極其廣大。暎蔽凡小。及以因人。

△五、釋大明佛

疏 大明者。佛智大明。無惑不破也。

鈔 佛證三智。皆有大明。能破三惑。及以二死。既能自破。亦能破他。

△六、釋寶相佛

疏 寶相者。相好殊特。如寶可貴也。

鈔 世間之寶。莫貴於善。如來之寶。莫貴相好。可尊

可重故喻於寶。

△七、釋淨光佛

疏淨光者。淨表法身。光表報應也。

鈔分字而釋。故名以義表。若合釋者。光表三智。淨表三身。證極清淨。超諸因位。金光明經云。如來遊於無量甚深法性。超諸菩薩所行清淨是也。

△二、發言勸信二。初牒科

○一、發言勸信

△二、列經

說誠實言。汝等眾生。當信是稱讚不可思議功德。一

切諸佛所護念經。

△四、北方二。初、牒科

○四、北方二。初、現相表彰

△二、釋經二。初、現相表彰二。初、列經

舍利弗。北方世界。有燄肩佛。最勝音佛。難沮佛。日生佛。網明佛。如是等恆河沙數諸佛。各於其國出廣長舌相。遍覆三千大千世界。

△二、釋義五。初、釋燄肩佛

疏 燃肩者。雙照眞俗。如肩發燄。

鈔 兩肩表權實二智。今兩肩發燄。表二智燄光照。

真俗二理也。

△次釋最勝音佛

疏最勝音者。梵音深妙。超勝一切。

鈔佛凡說法。以八音四辨。而宣暢之。所詮之理。最爲深妙。一切因人。所不能比。故言最勝。

△三釋難沮佛

疏難沮者。法身堅固。不可沮壞。

鈔佛具三身。舉一卽三。法身旣其堅固。報應亦必同之。要之皆不可沮壞也。

△四釋日生佛

疏日生者。如日初昇。無幽不燭。

鈔佛日行空。皆能燭幽。惟初生日。燭幽義顯。故偏言之。

△五、釋網明佛

疏網明者。智明如網。遍覆十界。

鈔佛之智慧光明。猶如因陀羅網。既互照莊嚴之不盡。亦徧覆十方之無餘。可表慈悲。蔭祐十界。

△二、發言勸信二。初牒科

○二、發言勸信

△二、列經

說誠實言。汝等眾生當信是稱讚不可思議功德。一切諸佛所護念經。

△五、下方二。初牒科

○五、下方二。初現相表彰

△二、釋經二。初現相表彰二。初列經

舍利弗。下方世界有師子佛。名聞佛名。光佛達磨佛。法幢佛。持法佛。如是等恆河沙數諸佛。各於其國出廣長舌相。遍覆三千大千世界。

△二、釋義六。初釋師子佛

疏 師子。如師子王。摧伏羣獸。

鈔。師子爲百獸中王。身力威猛。吼音雄震。力能伏獸。聲能裂腦。喻佛從意輪現身通。口輪說大法。眾生莫不皈依。邪魔悉皆摧伏。

△次釋名聞佛

疏。名聞者。名稱普聞無量世界。

鈔。佛有無量德。應有無量名。皆有稱名之實。一一不虛。一一諸名。聞於無量世界。莫不使聞者仰名食德。而獲利益。

△三釋名光佛

疏。名光者。名如日光。遍照一切。

鈔卽智光而爲名光。智隨名遍。而光依智照。

△四、釋達磨佛

疏達磨翻法所證法身。軌持萬化。

鈔陽春到處萬物遂生。法身遍處萬物咸軌。隨緣不失規矩。眞如不變難思。

△五、釋法幢佛

疏法幢法性如幢。高出羣有。

鈔法性高出者。乃出纏之法性也。諸佛眾生共而不共者以此。

△六、釋持法佛

疏持法。以中道實智。持二邊法。

鈔空有不能持中實者。下不能御上也。中實而能持二邊者。勝能統劣也。既不失中道。亦不失二邊。

△二、發言勸信二。初牒科

○二、發言勸信

△二、列經

說誠實言。汝等眾生。當信是稱讚不可思議功德。一切諸佛所護念經。

△六、上方二。初牒科

○六、上方二。初現相表彰

△二、釋經二。初、現相表彰二。初、列經

舍利弗。上方世界有梵音佛。宿王佛。香上佛。香光佛。
大燄肩佛。雜色寶華嚴身佛。娑羅樹王佛。寶華德佛。
見一切義佛。如須彌山佛。如是等恆河沙數諸佛。各
於其國出廣長舌相。遍覆三千大千世界。

△二、釋義十初、釋梵音佛

疏 梵音者。梵卽淨也。法音淨妙。聞者適悅也。

鈔 佛以己證清淨妙法。八音四辨。悅懷而說。契理
契機。無不適悅。

△次、釋宿王佛

疏宿王。如月照夜。星宿中王。

鈔三乘聖眾。猶如星宿。佛清淨月。如宿中王。以清淨法。蔭諸煩熱。

△三、釋香上佛

疏香上眾德如香。超諸因位。

鈔佛有五分身香。能總一切萬德。人所不能及。故以香上稱之。

△四、釋香光佛

疏香光。五分法香。如光破暗。

鈔佛名香光莊嚴者。以有五分法身之香。徧照法

界。破諸眾生不淨之暗故也。

△五、釋大燄肩佛

疏大燄肩大智發光雙照二諦。

鈔諸法實相不出眞俗故能照智祇惟權實故以兩肩發燄以表彰智境難思。

△六、釋寶華嚴身佛

疏寶華嚴身者萬行因華如寶莊嚴法性之身。

鈔佛身以諸相爲眾寶莊嚴者正表果德以萬行因華而莊嚴之也既以是而嚴身復以是而爲號欲令眾生覩相莫不志願思齊。

△七、釋娑羅樹王佛

疏娑羅。此云堅固。喻法身無變易故。

鈔西天以娑羅爲樹中王。震旦國惟峨眉王屋天台有之。樹有五德。一、婆娑蔭覆。二、密幄鱗砌。三、冬夏不凋。四、樹身堅固。五、華色香美。以是之故。稱樹中王。可喻如來大慈普被。萬德具足。常住寂滅。究竟堅固相好莊嚴。解中取堅固之義。以喻法身。爲其能統眾德故也。

△八、釋寶華德佛

疏四德如寶。如花開敷。

鈔佛之所寶。莫貴四德。芬芳輝煌。如花開敷。

△九、釋見一切義佛

疏見一切義。洞達諸法。甚深義故。

鈔諸法十界也。義趣者三諦也。惟佛與佛乃能究盡。故稱見一切義佛。

△十、釋如須彌山佛

疏如須彌山者。如妙高山。眾聖中尊。

鈔須彌山。四寶所成。故稱爲妙。表出眾山。故稱爲高。喻佛究竟常樂我淨。一切因人莫能過之。

△二、發言勸信二。初牒科

○二、發言勸信

△二、列經

說誠實言。汝等眾生當信是稱讚不可思議功德。一切諸佛所護念經。

△三、徵釋經題二。初、分科

○三、徵釋經題二。初、徵

△二、釋經二。初、徵二。初、列經

舍利弗。於汝意云何。何故名爲一切諸佛所護念經。

△二、釋義

疏佛自徵起下文釋之。

△二、釋二。初牒科

○二、釋

△二、釋經二。初、列經

舍利弗。若有善男子。善女人。聞是經受持者。及聞諸佛名者。是諸善男子。善女人。皆爲一切諸佛之所護念。皆得不退轉於阿耨多羅三藐三菩提。

△二、釋義四。初約三經釋

疏聞是經者。教經也。受持者。行經也。不退菩提。菩提是本有性德。理經也。三經卽是三德秘藏。圓該一切。舒之則彌綸法界。卷之則攝在一經。故使受

持之人。恆沙如來護念。不退菩提也。

鈔聞是下釋成三經。三經下會歸三德。理經卽法身德。行經卽般若德。教經卽解脫德。圓該一切者。明三德無所而不具也。舒之則彌綸法界者。一卽一切也。卷之則攝在一經者。一切卽一也。能如是了。則彌陀一經充滿法界可也。十方法界皆具此經可也。又須了達教行理經。舉一卽三。餘二易知。今但明行經。如執持名號。一心不亂。行經般若德也。所持名號萬德全彰。理經法身德也。念念滅除生死重罪。教經解脫德也。受持之人。如來護念。其

所護念。不在茲乎。

△次約附文釋

疏靈芝云。聞是經受持者。牒前依正莊嚴。修證因果之文。及聞諸佛名者。牒前六方稱讚之文也。護謂覆護。不使魔燒。念謂憶念。不令退失。唐譯云。聞是經已深生信解。必爲十方十殑伽沙諸佛世尊之所攝受。

鈔在文可知

△三約果號釋

疏阿耨多羅。此云無上。三藐。此云正等。二菩提。此

云正覺佛之果號。

△四、約功用釋

疏靈芝云。博地凡夫。業惑纏縛。流轉五道。百千萬劫。忽聞淨土。志願求生。一日稱名。卽超彼國。諸佛護念。直趣菩提。可謂萬劫難逢。千生一遇。

鈔萬劫難逢。千生一遇。亦有泛的不同。如雖聞大法。獲種善根。未必卽能頓超生死。以其輪迴難出大道。難成故也。今所說法。信受奉行。一日之功。超三僧祇。諸佛護念。的在是乎。

△三、流通分二。初牒科

○三、流通分二。初、佛勸信受二。初、勸信

△二、釋經二。初、佛勸信受二。初、勸信二。初、列經
是故舍利弗。汝等皆當信受我語及諸佛所說。

△二、釋義

疏叮嚀告誠。勉令生信。我及十方諸佛所說。

△二、顯益二。初、分科

○二、顯益二。初、由因克果二。初、正示二。初、修因

△二、釋經二。初、由因克果二。初、正示二。初、修因二。

初、列經

舍利弗。若有人已發願。今發願。當發願。欲生阿彌陀

佛國者。

△二、釋義

疏已卽過去。今卽現在。當卽未來。發願是因。得生是果。有願必生。萬無一失。

△二、感果二。初牒科

○二、感果

△二、釋經二。初列經

是諸人等。皆得不退轉於阿耨多羅三藐三菩提。於彼國土。若已生。若今生。若當生。

△二、解義

疏是諸下。唐譯云。一切定於無上菩提。得不退轉。於彼下。唐譯云。一切定生無量壽佛極樂世界。清淨佛土。是故皆應深心信解。發願往生。勿行放逸。**鈔**是諸人等。指前三時發願之人。皆得不退菩提者。非是他人。祇是於彼國土已發願者。則若已生。今發願者。則若今生當發願者。則若當生。然願非虛設。發必導行。行非浪施。修必因信。二者圓滿。必得往生。若得往生。決不退轉。

△二、結勸二、初牒科

○二、結勸

△二、釋經二。初。列經

是故舍利弗。諸善男子。善女人。若有信者。應當發願生彼國土。

△二、釋義二。初。明揀機

疏孤山曰。若有信者。應當發願。則揀出無信之人。
鈔採佛法寶。須假信手。苟無手人。徒入寶山。

△次。明他力

疏夫求生淨土者。是假他力。彌陀願攝。釋迦勸讚。諸佛護念。三者備矣。苟有信心。往生極易。如渡大
海。既得巨航。仍有良導。加以順風。必能速到彼岸。

矣。若其不肯登舟，遲留險道者，誰之過歟。

鈔假他力者，乃取多分爲言。以念佛三昧於功用，但稱名於期限方七日。苟不多假他力，云何卽得往生？他力有三。一、彌陀願攝。喻如巨航。二、釋迦勸讚。喻如良導。三、諸佛護念。喻如順風。惟其如此。是以速到。慈航已備。而不肯登舟。甘心於羅刹鬼國。嗜片時之五欲。知心墮落而不之恤。亦愚也哉。

△二、舉難況易二。初牒科

○二、舉難況易二。初我讚諸佛

△二、釋經二。初我讚諸佛二。初列經

舍利弗。如我今者稱讚諸佛不可思議功德。

△二釋義三初明二譯不同而同

疏此明諸佛互讚。唐譯但云。稱揚讚歎無量壽佛。今言稱讚諸佛者。以佛佛體同故。

△次引經證不同而同

疏華嚴云。一切諸佛身。唯是一法身。一心一智慧。力無畏亦然。

△三結二譯不同而同

疏是故稱讚彌陀。卽是讚諸佛也。

鈔華嚴云。一切諸佛各有自受用身。及以化境。則

彼此各各不同也。唯是一法身等則同也。此卽三德三身等種種三法。莫不皆同。豈非稱讚阿彌陀。卽是稱讚諸佛乎。

△二、諸佛讚我二。初牒科

○一、諸佛讚我二。初述彼讚詞

△二、釋經二。初述彼讚詞二。初列經

彼諸佛等亦稱讚我不可思議功德。而作是言。釋迦牟尼佛能爲甚難希有之事。能於娑婆國土五濁惡世。劫濁。見濁。煩惱濁。衆生濁。命濁中。得阿耨多羅三藐三菩提。爲諸眾生說是一切世間難信之法。

△二釋義四。初泛明諸佛同讚。

疏彼諸佛等亦稱讚我則彌陀亦同諸佛稱讚釋迦也。

鈔彼此雖各相讚而其所讚正自不同如釋迦之讚彌陀則以能大慈與樂取土攝受彌陀之讚釋迦則以能大悲拔苦現土折伏雖有互用實亦互益故拔苦正欲與樂與樂正欲拔苦慈悲兼濟與拔並施若嚴父之與慈母道並行而不相悖也。

△次述彼諸佛讚詞五。初明因德立稱

疏釋迦此云能仁牟尼此云寂默能仁則大慈應

物寂默則大智冥理。

鈔大智冥理。自證之體也。大慈應物。化他之用也。今正言應用。如來應於五濁惡世。是以號爲能仁。△次明稱名之德。

疏能爲甚難。希有之事者。下文自釋。一、於五濁得菩提。二、爲眾生說難信之法。

鈔釋迦之所以稱能仁者。蓋有二能焉。一、於難得菩提之土。而得此菩提。是故號爲寂默。蓋能於非寂非默之境。而得寂默菩提。此一能也。二、於剛強濁惡不解之土。而說此妙法。是故號爲能仁。蓋能

於謬信謬解之人。而說難信之法。是故號爲能仁。此二能也。

△三釋所化之國二初釋娑婆

疏梵語娑婆。此云堪忍。以眾生堪能忍受三毒諸煩惱故。

鈔三毒者貪瞋痴也。總該五利使。五鈍使。見惑十八使。思惑八十一品也。皆稱煩惱者。煩如煩熱。惱卽惱亂。不得須臾清涼自在。亦可謂之極苦矣。然而恬然忍受。不特不以之爲苦。猶且以之爲樂。此其所以稱堪忍也。

△次釋五濁二。初總釋

疏五濁者。楞嚴云。譬如清水投之沙土。土失畱礙。水亡清潔。泊然渾濁。由此五濁。理水亡清。

鈔清水喻眞空之理。沙土喻見思。并所召果色。一理一惑。相織妄成。由是水失清淨。土失畱礙。故曰由此五濁。理水亡清。名之爲濁。但此經五濁與楞嚴麤細不同。事理咸異。若會而歸之。又不同而同也。

△次別釋五。初劫濁

疏劫者。梵語劫波。此云時分。從減劫人壽二萬歲

時卽入劫濁。四濁增劇。聚在此時。瞋恚增劇。刀兵起。貪欲增劇。饑饉起。愚痴增劇。疾疫起。三災起。故煩惱倍隆。諸見轉熾。眾濁交湊。如水奔昏。

鈔劫名時分。以世界爲體。世界有成住壞空爲四大時分。每一時分有二十翻增減之久。今は住劫減劫之末。減劫之初。人壽有八萬歲。過一百年減一歲。減至二萬歲。卽入劫濁。濁未增盛。自爾已後眾生三毒日增月盛。至釋迦時。人壽百歲。故曰四濁增劇。聚在此時。刀兵等者。小三災也。生當此時。災起不常。職由人心三毒所感。然猶未至太劇。減

至人壽十歲之時。此小三災方名極隆。世界眾生將無噍類。謂之子德減父德。子年減父年。然後人心厭苦。漸能遷善。由是又過百年。增壽一歲。壽逾增而善逾進。增至八萬歲而後止。謂之子德增父德。子年倍父年。如是凡經二十番。然後入於壞劫。則火水風大三災。次第發現。復經如是二十番時。方入空劫。空二十番時。世界復成。亦二十番時。方入住劫。當釋迦時。正住劫第九番減劫之時。故曰能於五濁惡世等。

△次釋見濁

疏見者。身見。邊見。戒取。見取。邪見。五利使。乃至六十二見等也。

鈔身見者。謂於五陰中妄計有身。强立主宰。恆起我見。執我我所。是名身見。邊見者。謂計我身或斷或常。執斷非常。執常非斷。但執一邊。是名邊見。戒取者。謂於非戒之中。謬以爲戒。強執勝妙。希取進行。是名戒取。見取者。謂於非真妙法中。謬計涅槃。心生取著。妄計所得爲勝。是名見取。邪見者。謂邪心取理。顛倒妄見。不信因果。斷諸善根。作闡提行。是名邪見。出涅槃經。六十二見者。謂外道之人。於

色受想行識五陰法中。每一陰起四種見。謂計色大我小。我在色中。我大色小。色在我中。離色是我。卽色是我。色陰既爾。餘四亦然。成二十見。約過去現在未來三世論之。成六十見。加斷常二見爲根本。共六十二。出涅槃經。五利使者。利卽快利之義。謂此五種妄惑動念卽生。造次恒有。使卽驅使之義。謂諸眾生爲此五種妄惑。驅逐心神。流轉三界。無有出期。故名使也。

△三釋煩惱濁

疏煩惱者。貪瞋痴慢疑五鈍使。乃至百八煩惱等。

是也。

鈔貪卽引取無厭也。謂諸眾生貪著世間色欲財寶。恣縱心情而無厭足。瞋卽忿怒。謂諸眾生於違情境上。起諸瞋恚。惱亂自他。痴卽迷惑不了。謂諸眾生以迷心緣境。於一切法不能明了。慢卽自恃輕他。謂諸眾生自恃種姓富貴。有德有才。輕慢於他。疑卽猶豫不決。謂諸眾生迷心乖理。不能通達法相。五鈍使者。鈍卽遲鈍。謂此五種妄惑。旣非動念卽生。亦非造次恆有。故言鈍也。百八煩惱者。昏煩之法。惱亂心神。故名煩惱。謂眼、耳、鼻、舌、身、意六

根對色聲香味觸法六塵各有好惡平等三種不同則成十八煩惱。又於其中起苦受樂受不苦不樂受復有十八共三十六種更約過去現在未來三世各有三十六種總成百八煩惱也。

△四、釋眾生濁

疏眾生者攬五陰見慢果報立此假名。

鈔眾生者多也。攬五陰實法立眾生假名而言見慢果報者約由因感果爲義見慢卽過去利鈍二使之因果報卽現在五陰之果。

△五、釋命濁

疏命者刹那生滅摧年促壽。

鈔釋迦現世人壽八十。雖名曰短。較年猶長。復以年而較月。以月而較日。漸漸相較。至于刹那。一念有九十剎那。刹那有九百生滅。所謂豈惟年變。兼又日遷。以至喻云。如火成灰。念念銷殞。殞亡不息。決知此身終從變滅。蓋世人之壽爲八相所遷。所謂小四相遷大四相。故曰刹那生滅摧年促壽。

△三、結皆由悲願

疏悲華經云。吾以大悲本願力故。處此濁惡不淨國土。

鈔濁惡國土眾生悲苦。正與釋迦悲願相應。所謂下合六道眾生。同一悲仰。求生淨土眾生仰樂。正與彌陀慈願相應。所謂上合十方諸佛。同一慈力。然而釋迦之悲。非不兼慈。彌陀之慈。非不兼悲。今對二土淨穢。故偏言一邊耳。

△四、結難信之法

疏夫念佛三昧。不揀賢愚。不擇貴賤。不論久近。不分善惡。唯取決定信心。臨終惡相。十念往生。此乃具縛凡愚。屠沽下類。剎那超越成佛之法。可謂一切世間。甚難信也。

鈔夫佛法大海。一味平等。固於賢愚貴賤無所分別。若言臨終惡相。十念往生。惟淨土一門。方有是事。一切世間。實爲難信。可謂大乘中之大乘。了義中之了義也。

△二、顯示不虛二。初牒科

○二、顯示不虛

△二、釋經二。初列經

舍利弗。當知我於五濁惡世。行此難事。得阿耨多羅三藐三菩提。爲一切世間說此難信之法。是爲甚難。

△二、釋義二。初明釋迦具足二難

疏孤山曰。五濁界中。行難行之行。而得菩提。其事已難。復說此難信之法。一事兼行。是甚難也。諸佛讚我。豈虛言哉。

鈔諸佛同讚釋迦者。謂具二難故。一者。於難成道之國。而能成道。二。於難生信之人。而說此法。對顯諸佛。則成二易矣。

△次顯二土修行難易。

疏慈雲云。五濁得道爲難。淨土修行則易。

鈔慈雲大師云。娑婆得道有十難。一、不常值佛。二、不聞說法。三、惡友牽纏。四、羣魔惱亂。五、輪迴不息。

六、難逃惡趣。七、塵緣障道。八、壽命短促。九、修行退失。十、塵劫難成。淨土修行有十易。一、常得見佛。二、常聞法音。三、聖賢集會。四、遠離魔事。五、不受輪迴。六、永離惡趣。七、勝緣助道。八、壽命無量。九、入正定聚。十、一生行滿。難易之狀明言如此。可不捨難而取易乎。

△二、眾喜奉行二。初牒科

○一、眾喜奉行

△二、釋經二。初列經

佛說此經已。舍利弗及諸比丘。一切世間。天人阿修

羅等。聞佛所說歡喜信受作禮而去。

△二釋義五初約機收簡。

疏一切世間總收四眾十界別舉三善道者多受化之機故也。天謂梵釋欲色等天。阿修羅此云非天富貴同天而多詭詐無天行故等者等於八部鬼神同聞眾也。

鈔解中明經所敘聞法之機有收有簡。一切世間則總收四眾十界。四眾固是常聞法者。十界則兼收四趣。謂所收機若是之廣也。天人修羅則簡去餘趣。惟舉三善道也。謂所受化之機若此之多也。

此且就一往約餘經者爲言。若極樂法門。如大本中說。臨終地獄相現。以至蜎飛蠕動。皆以願力攝之。令生彼國。則所攝之機誠宜四眾十界。無所而不收也。

△次明益所以。

疏孤山曰。聞所未聞。故歡喜信受。重法尊師。故作禮而去。

△三、獲益淺深。

疏言歡喜者。義該深淺。或得歡喜益。或證理入歡喜地。

鈔得歡喜益者。約世界悉檀判也。入歡喜地者。約第一義悉檀判也。

△四、引證深益

疏故大本結益無量眾生發菩提心。那由他人得法眼淨。

鈔發菩提心位在大乘。得入理益。得法眼淨。位在小乘。得入理益。經又云。信受奉行。則又獲爲人悉檀生善之益。惟闕對治悉檀破惡之益。既有三益。應亦該之。

△五、流通永永

疏宣布十方。垂於萬世。盡未來際。利樂無窮。
鈔流通之法。大要兩種。一、自行。二、化他。自行又有
兩種。一、如說修行。卽七日持名。一心不亂。二、讀誦
經文。隨文解義。昔梁朝有道珍法師。嘗於廬山念
佛作水觀。忽夢江水瀾滿。眾人乘船。言往西方。珍
言。道珍一生修西方業。可附我而去。船上人云。法
師雖講經甚大。未誦彌陀經。並往生咒。未浴僧淨
業。未圓不得往也。珍於是感泣。夢覺後。乃廢講業。
專誦此經。及往生咒。并營僧浴。至垂終夜。異光明
耀峯頂。如列數千炬。神人持珍臺而至。請師往生。

故知流通願生。不可以不讀誦也。二、化他者。卽純以此經爲人演說。勸他念佛。願生極樂。或書寫解釋。莫非其行。以此化他功德。回向淨土。發願往生。昔四明智學諭。常以擘窠圖印施。勸人念佛。有計公桃源鐵工也。年將七十。兩目喪明。初受一圖。念滿三十六萬聲。念至四圖。兩目瞭然。如是三載。念滿十七圖。一日念佛忽然氣絕。半日復甦。曰。我見佛菩薩令分六圖。與智學諭是勸導之首。分一圖與李二公。此是表圖之人。囑其子往謝學諭。言訖沐浴。西向坐逝。以此而觀。勸人念佛亦往生之行。

況智學諭既能勸人。豈不能自念。自利兼人功德。
倍隆。往生淨土品位必高。

彌陀畧解圓中鈔卷下終

附刻

拔一切業障根本往生淨土神咒

捺摩阿彌多婆夜 一 哆他伽哆夜 二 哆地夜他 三 阿

彌利都 四

婆毘 五

阿彌利哆 六

悉耽婆毘 七

阿彌利

哆 八

毘伽蘭帝 九

阿彌利哆 十

毘伽蘭哆十一

伽伽那十二

枳多迦隸十三

莎婆訶

十四

佑師云。咒是梵語。此方之人持誦不經師授。訛謬實多。此咒載養字函。書者節句差誤。後人沿襲。遂失其正。龍舒淨土文。樂邦文類等。不原所以執之爲是。而反以正爲誤。聞義不從。謬之甚矣。請以楞

嚴咒等比對可知。今依正本刊印。普勸誦持。使密語流行。不失其正也。○余謂佑師旣準楞嚴咒節。正句逗。則第四句應同第六句四字爲句。移第五句都字歸上爲阿彌利都。第五句但婆毘二字爲句。佑師所撰淨土指歸中亦載此咒。謂哆字雖音多曷切。不可作入聲重呼。當與帶字同音。此亦深有所以。蓋哆字若依篇韻應讀作多。今多曷切讀作帶者。乃梵音彈舌之聲。蓋爲東華無彈舌聲字。故譯人凡遇彈舌聲。卽以此方字加之以口。但遇有口字悉須彈舌。今哆字加口。而讀作帶便成彈舌之聲故也

刻圓中鈔跋

佛說阿彌陀佛一經。其猶富貴人家。家常之飯譜。堂室之物帳。衣服之欵記。苑囿之花疏。不過直紀其事。以付當家兒。使其守之弗失。用之不窮。又何必贅以註脚。疣以鈔釋。第慮少年子弟。厭膏梁而莫辨菽麥。侈錦繡而罔識桑麻。是以長者之側。臣佐吏民。註記券疏者。得握筆而進矣。吳門蘧菴法師之畧解。余首登講席時。以之發軔。經三十餘年。恍焉若新。然解雖稱畧。于中多涉教門關鑰。乃爲初學鈔出圓中。已證惟心淨土。本性彌陀者。必以是爲芻狗。若夫方問徑

於清泰者不無少裨云。四明延慶法子圓復募刻流
通。余嘉其有自益公人之志。故復爲之跋。
皇明天啟五年冬傳天台無盡燈僧書

阿彌陀經畧解圓中鈔

(彌陀圓中鈔)

◎恭印者：湛然寺

地 址：臺南市 70050 忠義路 2 段 38 巷 8 號

電 話：(〇六) 二二二八五一八

郵 撥：三一九二三五一・聖哲帳戶

◎承印者：和裕出版社

地 址：臺南市 70953 海佃路 2 段 636 巷 5 號

電 話：(〇六) 二四五四〇二三

中華民國九十五
佛曆三〇三三年四月依本寺線裝本影印一〇〇〇本

中華民國一〇七
佛曆三〇四五五年四月恭印一〇〇〇本





